

四庫全書

史部

欽定四庫全書

史部

朱子年譜卷四

詳校官編修

臣范來宗

刑部郎中

臣

許兆椿覆勘

總校官檢討

臣

何思鈞

校對官編修

臣

吳典

謄錄監生

臣

施華

欽定四庫全書

朱子年譜卷四

寶應王懋竑撰

光宗紹熙元年庚戌六十一歲夏四月二十四日到郡

首頒禮教

年譜臨漳素號道遠比年風俗寢薄先生以民未知
禮至有居父母喪而不服衰經者首下教述古今禮
律以開喻之又探古喪葬嫁娶之儀揭以示之命父
老解說以訓子弟其俗尤崇尚釋氏之教男女聚僧
廬為傳經會女不嫁者私為菴舍以居悉禁之俗為
大變時詣學校訓誘諸生如南康時其至郡齋請業

問難者接之不倦又擇士之有行義知廉耻者使列學職為諸生倡語錄郡中元自出公牒延郡士黃知錄施允壽石洪慶李唐咨林易簡楊士訓及淳于永嘉徐寓八人入學而張教授與舊職事沮格至是先生下學僚屬又有乞留舊有官學正有司只得守法言者不止先生變色厲詞曰郡守以承守宣化為職不以簿書財計獄訟為事某初到此未知人物賢否風俗厚薄今已九月矣方知得學校底裏遂欲留意學校所以採訪鄉評物論延請黃知錄以其有恬退之節欲得表率諸生又延請前輩士人同為之表率欲使邦人士子識些向背稍知為善之方與一邦之人共趨士君子之域以體朝廷教養作成之意不謂作之無應弄得來沒合殺教授受朝廷之命分教一邦其責任不為不重合當自行規矩而今却容許多無行之人爭訟職事人在學枉請官錢都不成學校士人先要識箇廉退之節禮義廉耻是謂四維若

寮廉鮮耻雖能文要何用某雖不肖深為諸君耻之
謝先生熟聞知錄趙師處之為人試之政事又得其
實遂首舉之其詞曰履行深醇持心明恕聞者莫不
心服大暢逆某在漳州初到時教習諸軍弓射等事皆
無一人能之後分許多軍作三番每日輪番入校場
挽弓及等者有賞其不及者留在只管挽射及等則
止終不及則罷之兩月之間翕然都會射及上等者
亦多後多留剌以填闕額其有老弱不能者並退罷
之孫某賀某為守一日詞訴一日著到合是第九日亦
詞訟某却罷了此日詞訟明日是休日今日便刷起
一句之內有未了者一齊都要了大抵做官須是自
家常閒吏胥常忙方得若自家被文字來叢了討頭
不見吏胥便來作弊做官須是立
網紀網紀既立都自無事孫某賀某

奏除屬縣上供罷科茶錢及蠲減本州無額經總制錢

凡萬餘緡

奏狀云將諸州縣所認折茶錢罷科荔枝龍眼乾錢抱認豐國監鑄不足鉛本錢七千六百十四貫及近年所增經總制無額錢四千七百五十四貫盡與蠲減行狀奏除屬縣無名之賦七百萬減經總制錢四百萬

文集乞蠲減漳州上供經總制額等錢狀

條畫經界事宜申諸司

年譜初先生為同安簿已知經界不行之害及改命臨漳會臣僚有奏請行於泉漳汀三州者詔監司條具利害以聞監司下其事於州先生既至適與初意合即加訪問講求纖悉畢究以至弓量算造之法盡得其說乃具申諸司以經界行否之利害一經界詳畧之利害一又得其必可行之術三將不得行之慮

一蓋謂田稅均則為公私之利否則為害行之詳則足為一定之法行之畧則適滋他日之弊故差官置局打量步畝攢造圖帳三者皆必可行而三者又各為條畫其便宜使之無擾而辦但此法之行貧民下戶雖所深喜而豪民猾吏皆所不樂喜之者皆困苦單弱無能之人故雖有懇誠而不能以言自達不樂者皆才力辨智有餘之人故其所懷雖實私意而善為說辭以惑羣聽恐脅上下務以必濟其私而賢士大夫之喜安靜厭紛擾者又或不能深察其情而望風沮怯例為不可行之說以助其勢此則誠不能無將不得行之勢也

詔相度漳州先行經界秋八月上條奏經界狀

奏狀云准省劄令臣相度漳州先行經界事須至條畫奏聞一推行經界最急之務在於推擇官吏欲乞

朝廷先令監司一員主其事使擇一郡守臣汰其昏
繆疲輒力不任事者而使郡守察其屬縣令或不能
則擇於其任又不能則擇於它官一州不足則取於
一路見任不足則取於得替待缺之中皆委守臣踏
逐申差只以措置經界為名使之審思熟慮於其始
而委任責成於其終事畢之後量加旌賞一經界之
法打量一事最費功力而紐折算計之法又人所難
曉本州已差人於隣近州縣已行經界去處取會到
紹興年中施行事目及募本州舊來有曾經奉行諳
曉算法之人選擇官吏將來可委者日逐講究聽候
指揮但紹熙年中戶部行下打量攢算格式印本未
見全文乞照戶部根檢勝錄點對行下一圖帳之法
始於一保凡山川道路人戶田宅頃畝之濶狹水土
之高低當衆共定各得其實其十保合為一都諸都
合為一縣則其圖帳但取大界總數而已不必更為
諸保諸都之別也今只令役戶作草圖草帳而官為

置紙顧工以造正圖正帳專委守倅及所差官會計
費用若干具中漕憲於本州上供錢內截撥應副則
大利可成而民亦不至於煩費矣一紹興經界打量
既畢隨畝均產而其產錢不許過鄉今恐逐鄉產錢
祖額本來已有輕重雖一番打量攢算而未足以革
其本來輕重不均之弊欲乞特許產錢過鄉通縣均
紐庶幾百里之內輕重齊同實為利便一本州民間
田有產田有官田有職田有學田有常平租課田名
色不一而其所納稅租輕重亦各不同姦民猾吏並
緣為姦為今之計盡去此等名字只將見在田土打
量步畝一概均產每田一畝隨九等高下定計產錢
幾文而總計一州諸色租稅錢米之數却以產錢為
母別定等則一例均數每產一文納錢若干米只一
倉受納錢亦一庫交收却以到官之數照元分數分
課逐旋撥入諸色倉庫除逐年二稅造簿之外遇辰
戌丑未年逐縣令諸鄉各造一簿開具本鄉所管田

數四至步畝等第各注某人管業有典賣則云元係某人管業某年典賣某人見今管業却於後項通結逐一開具某人田若干座錢若干使其首尾相照又造合縣都簿一扇類聚諸簿通結逐戶田若干畝座錢若干丈其有田業散在諸鄉者則併就烟爨地分開排總結并隨秋料稅簿送州印押下縣知佐通行收掌人戶遇有交易即將契書及兩家砵基照鄉縣簿對行批鑿則版圖一定而民業有經矣一本州更有荒廢寺院田產頗多目今并無僧行住持田土為人侵占失陷稅賦不少乞特降指揮許命本州召人實封請買不惟一時田業有歸亦免向後官司稅賦因循失陷而又合於韓愈所謂人其人廬其居之意文集與留丞相劄子云恭奉聖旨相度經界利病皆是一郡永久利害而經界尤利害之大者所以不避僭率極意盡言不敢少有顧望前卻首鼠兩端之意退而講究巨細本末不敢不盡規摹措畫益已什八

九成矣鄙意無他益以本州田稅不均隱漏官物動以萬計公私田土皆為豪宗大姓說名冒占而細民產去稅存或更受徭寄之祖困苦狼狽無所從出州縣既失經常之入則遂多方掣畫取其所不應取之財以足歲計如諸縣之科罰州郡之賣鹽是也上下不法莫能相正窮民受害有使人不忍聞者熹自到官蓋嘗反復討論欲救其弊而隱實郡計入不支出乃知若不經界實無措手之地所以前此申奏欲得及此秋冬之交早賜行下竊聞廟堂有意施行亦有陽為兩可而陰實力沮之者只今已近冬至更五十日即是新春設使便蒙施行亦無日子可以辦集矣語錄經界即行也安得盡無弊只是十分弊也須革去得九分半所餘者一分半分而已今人却情願受這十分重弊壓在頭上都不管及至纔有一人理會起便去搜剔那一分半分底弊來瑕疵之以為決不可行如被人少却百貫千貫却不管及被人少却百

錢千錢便反到要與理會今人都是這般見識而今分明是有箇天下國家無一人肯把做自家物事看解文集經界申諸司狀再申諸司狀條奏經界狀

九月奏劾黃爰罪狀

奏狀言縣官黃爰怠慢不職專務營私不以國家養兵捕盜為念其土軍月糧不為及時交納致令一寨土兵饑餓狼狽實非細事委是難以存留在任本州遂將黃爰與龍巖縣主簿對移己申尚書省並諸司照會訖欲望聖斷將黃爰重賜施行以為官吏慢令廢職不恤軍民之戒文集按黃爰狀

冬十月以地震及足疾不能赴錫宴自劾仍請祠不允

行狀會朝論欲行泉漳汀三州經界先生初任同安
已知經界不行之害至是訪事宜擇人物以至弓量
之法洞見本末遂疏其事上之蓋經界法行息爭止
訟大為民利而占田隱稅侵漁貧弱者所不便及具
宣德意榜之通衢則邦人鼓舞而寓公豪石果為異
議以沮之遂因地震及足疾不赴錫宴自劾文集與
留丞相劄子云九月中州境屢有地震之異未及自
劾以聞而舊疾發動遍傳兩足痛楚呻吟不可堪忍
以至滿散錫宴之日不得少伸臣子歸美報上之誠
宋史十一月二十又所請罷科茶錢無額經總制錢之
屬久不蒙開允經界聞亦有陽為兩可而陰力沮之
者至於按劾弛慢不虔之吏諸司又不主張甚有已
行取勘而無故自引罷者如此使熹寧復更有顏面
可臨吏民已具奏牒乞從罷黜而並以此私布腹心
於下執事伏惟少賜矜憐復
得奉祠則又千萬之幸也

刊四經四子書于郡

年譜士辰奉以告諸先聖各為說繫於後以曉世之學者文集書臨漳所刊四經後

易載易本

詩載

集傳

書

世傳孔安國尚書序言伏生口傳書二

十八篇

堯典皋陶謨禹貢甘誓湯誓盤庚高宗彤日

日

西伯戡黎微子牧誓洪範金縢大誥康誥酒誥梓材

召誥洛誥多士無逸君奭多方立政顧命呂刑文侯

之命費誓秦誓孔子壁中書增多二十五篇大禹謨

五子之歌肅征仲虺之誥湯誥伊訓太甲上太甲中

太甲下咸有一德說命上說命中說命下秦誓上秦

誓中秦誓下武臣旅葵微子之命蔡仲之命周官君

陳畢命君牙冏命分伏生書中四篇為九篇又增多

五篇舜典益稷盤庚中盤庚下康王之誥並序一篇

合之凡五十九篇及安國作傳遂引序以冠其篇首

而定為五十八篇今世所行公私版本是也然漢儒

以伏生之書為今文而謂安國之書為古文以今考之則今文多艱澁而古文反平易或者以為今文自伏生女子口授晁錯時失之則先秦古書所引之文皆已如此或者以為紀錄之實語難工而潤色之雅詞易好則暗誦者不應偏得所難而考文者反專得其所易是皆有不可知者至諸序之文或頗與經不合如康誥酒誥梓材之類而安國之序又絕不類西京文字亦皆可疑獨諸序之本不先經則賴安國之序而可見故今別定此本一以諸篇本文為經而復合序篇於後使覽者得見聖經之舊而不亂乎諸儒之說又論其所以不可知者如此使讀者姑務沉潛反復乎其易而不必穿鑿傳會於其所難者云紹熙庚戌十月 春秋 熹之先君子好左氏書每夕讀之必盡一卷乃就寢故熹自幼未受學時已耳熟焉及長稍從諸先生長者問春秋義例時亦窺其一二大者而終不能以自信於其心以故未嘗敢輒

措一詞於其間而獨於其君臣父子大倫大法之際
為有感也近刻易詩書於邸帑易用呂氏本古經傳
十二篇而舛詩書之序置之經後以曉當世使得復
見古書之舊而不錮於後世諸儒之說顧三禮體大
未能緒正獨念春秋大訓聖筆所刊不敢廢塞而河
南邵氏皇極經世學又以易詩書春秋為皇帝王霸
之書尤不可以不備乃復出左氏經文別為一書以
踵三經之後其公穀二經所以異者類多人名地名
而非大義之所繫故不能悉具異時有能放呂公之
法而為三經之音訓者尚有以成吾之志也哉書
臨漳所刊四子後聖人作經以詔後世將使讀者
誦其文思其義有以知事理之當然見道義之全體
而身力行之以入聖賢之域也其言雖約而天下之
故幽明巨細靡不該焉欲求道以入德者舍此為無
所用其心矣然去聖既遠講誦失傳自其象數名物
訓詁凡例之間老師宿儒尚有不能知者況於新學

小生驟而讀之是亦安能遽有以得其大指要歸也哉故河南程夫子之教人必先使之用力乎大學論語中庸孟子之言然後及乎六經蓋其難易遠近大小之序固如此而不可亂也故今刻四古經而遂及乎此四書者以先後之且考舊聞為之音訓以便觀者又悉著凡程子之言及於此者附於其後以見讀之之法學者得以覽焉抑嘗妄為中庸雖七篇之自出然讀者不先於孟子而遽及之則亦非所以為入道之漸也因竊并記於此云紹熙收元臘月

文集刊四經成告先聖文

年譜按語錄云某如今方見得聖人一言一字不吾欺只今六十一歲方理會得恁地又云熹覺得今年方無疑非章句某當初講學也豈意到這裏幸而天假之年許多道理在這裏今年頗覺勝似去年去年勝

似前年丁巳先生教人以大學語孟中庸為入道之序而後及諸經以為不先乎大學則無以提綱挈領而盡語孟之精微不參之語孟則無以融會貫通而極中庸之旨趣然不會其極於中庸則又何以建立大本經綸大經而讀天下之書論天下之事哉其於讀書也必使之辨其音釋正其章句玩其辭求其善研精覃思以究其所難知平心易氣以驗其所自得然為己務實辨別義利毋自欺謹其獨之戒未嘗不三致意焉洪本

列上釋奠禮儀

耳譜先是南康淮禮部符下政和五禮祭祀儀式其中未有詳備又朝廷編類臣民禮儀鏤板頒降亦恐有未詳備處乞更增修事未施行至是乃復列上釋奠禮儀數事且移書禮官乃得頗為討究則淳熙所

鏤之板已不復存後乃得於老吏之家又以議論不一越再歲始能定議得請施行而主其事者適徙他

官遂格
洪本

別集中禮部檢狀

十一月詔先將漳州經界措置施行

申狀云尚書省十二月二日劉子福建轉運提刑提舉司奏相度到泉漳汀三州經界十一月二十六日降指揮先將漳州措置施行行狀冬有旨先行漳州經界南方春早事已無及明年屬有嗣子之喪再請奉祠其後經界竟報罷語錄問欲行經界本末曰本一官員姓唐上殿論及此尋行下漳泉二州相度本州以為可行而泉州顏尚書操兩可之說致廟堂疑貳却是因黃伯耆再論上如其請即時付出三省宰

執奏請又止
且行於漳州

二年辛亥六十二歲春正月申轉運司經界乞候冬季

打量

申狀云正月九日准省劄十一月降指揮先將漳州經界措置施行熹自去年累次申請欲於秋成之後即便打量東作之前次第了畢目今雖是正月中旬旬然閩南地煖纔及冬春之交民間已是耕犁若於此時施行不惟有妨農務而春雨水常多原野泥濘恐亦難得應期了畢欲望使司詳酌其宜特賜敷奏許俟七月一日方行差十月一日然後打量文集與留丞相劄子云經界已被漕檄闡命之日已是正月初農事方興不容措手已申漕司乞候十月一日打量矣其合預行措置事件則目今不住施行講究令益

精審以俟及期而行但此事之行雖細民之所願欲而豪家右族倚勢并漁者惡其害己莫不陰謀詭計思有以動搖未知此八九月之間事體又復何如更願丞相深察其情而以天下至公之理裁之有以終惠此邦之人而不隨於騰口間說之計則如熹等輩尚得以効奔走而徵幸於有成如其不然則當以微罪自劾而歸不敢遊丞相陶鈞之內矣年譜宰相留正泉人也其里黨多以為不可行先生與書再三切言之有旨先行漳州經界而已是春初事已無及二月先生以子喪乞祠去即冬十月漳州進士吳禹圭訟其擾人詔寢其事而三州經界訖不行

洪

奏請褒東溪高公登直節

年譜高東溪先生名登漳浦人為古縣令以直言忤秦檜削官徙容州死舊有祠郡學中先生為之記至

是奏請於朝昭雪褒贈以旌其直節洪文集與留丞相書云高古縣特蒙主張得被仁聖漏泉之澤九原忠憤一旦獲伸丞相所以褒顯忠直摘抑姦諛之意不但施之今日周行之間所勸多矣
文集乞褒錄高登狀

二月以嗣子喪請祠

年譜正月癸酉長子塾卒於婺州報至即以繼體服斬衰丐祠歸治喪葬

奏薦知龍溪縣翁德廣

奏狀言德廣天資剛直才氣老成不為赫赫可喜之名而有懇懇愛民之實察其施為庶幾乎古之循吏者欲望聖慈特與陞擢差遣以為官吏勤事愛民之勸文集與留丞相書云龍溪亦蒙收召之恩始望益

不及此

文集薦知龍溪縣翁德廣狀

三月復除秘閣修撰主管南京鴻慶宮

行狀屬有嗣子之喪再請奉嗣除秘閣修撰主管南京鴻慶宮語錄先生以喪嫡子丐祠甚堅當路者又以經界一奏先生持之力雖已報行而終以不便己為病幸其有是請也亟啓從之

淳熙

夏四月二十九日去郡辭職名

年譜先生去郡即辭免職名蓋上初政嘗中孝宗是命力辭得請已降褒詔難以復受故再辭焉本洪先生在臨漳僅及一期以南陌敝陋之俗驟承道德正大之化始雖有欣然慕而亦有愕然疑譁然毀者

越半年後人心方肅然以定僚屬志節而不敢恣所欲仕族奉繩檢而不敢干以私胥徒易慮而不敢行姦豪猾歛蹤而不敢冒法平時習浮屠為傳經禮塔朝岳之會者在在皆為之屏息平時附鬼為妖迎遊於街衢而抄掠於閭巷亦皆相視歛戢不敢輒舉良家子女從空門者各閉精廬或復人道之常四境狗盜之民亦望風奔遁改復生業至是及期正爾安息先生之化而先生行矣豈不深可恨哉淳

文集辭免秘閣修撰狀一

五月歸次建陽寓同繇橋

文集與留丞相書云以四月二十六日解罷郡事越三日發臨漳五月二十四日遂抵建陽答吳伯豐書云此間寓居近市人事應接倍於山間今不復成歸五夫見就此謀卜居已買得人舊屋明年可移目

今且架一小書樓
更旬月可畢工也

秋七月復辭職名不允乃拜命

文集辭免秘閣修撰狀二

九月除荆湖南路轉運副使辭不允冬十二月復辭以

經界不行自劾

文集辭免湖南運使狀一

狀二即自劾狀

文集與留丞相書云蒙垂諭深以士大夫之朋黨為患此古今之通病誠上之人所當疾也然熹嘗謂朋黨之禍止於縉紳而古之惡朋黨而欲去之者往往至於亡人之國蓋不察其賢否忠邪而惟黨之務去則彼小人之巧於自謀者必將有以自益其迹而君

子持其公心直道無所回互往往反為所擠而目以
為黨漢唐紹聖之已事今未遠也熹雖至愚伏讀丞
相所賜之書知丞相愛君憂國之心無一言一字不
出於至誠惻怛此天下之賢人君子所以相率而願
附於下風也而未能不以朋黨為慮熹恐丞相或未
深以天下之賢否忠邪為己任是以上之所以告於
君者未能使之判然不疑於君子小人之分下之所以
行于進退予奪者未能有以服天下之心慰天下之
望而陰邪讒賊常若反有侵凌干犯之勢也夫杜門
自守孤立無朋者此一介之行也延納賢能黜退姦
險合天下之人以濟天下之事者宰相之職也奚必
以無黨者為是而有黨者為非耶夫以丞相今日之
所處無黨則無黨矣而使小人之道日長君子之道
日消天下之慮將有不可勝言者則丞相安得辭其
責哉熹不勝愚者之慮願丞相先以分別賢否忠邪
為己任其果賢且忠耶則顯然進之惟恐其黨之不

衆而無與共圖天下之事也其果姦且邪耶則顯然
黜之惟恐其去之不盡而有以害吾用賢之功也不
惟不疾君子之為黨而不憚以身為之黨不惟不憚
以身為之黨是又將引其君以為黨而不憚也如此
則天下之事其庶幾乎前年逐二諫官去年逐一御
史近聞又逐一諫官矣上下不交而天下將至於無
邦丞相不此之慮而慮士大夫之為黨其亦誤矣
又與留丞相書云抑又聞之天下事勢有消長賓主
之不同以易而言方其復而長也一陽為主於下而
五陰莫之能遏及其姤而消也五龍天矯於上而不
足以當一陰羸豕蹢躅之乎甚可畏也丞相觀於今
日之勢孰為主而方長乎孰為客而方消乎孰能制
人而孰為制於人者乎于是焉而汲汲乎以求天下
之賢以自助使之更進迭入日陳安危治亂之明戒
以開上心排抑陰邪無使主勢小傾而陷入其黨尚
恐後時而無及於事不精而未免有失亦何遽至預

憂其分別太甚而為異日之患乎又與留丞相書云願丞相深觀大易陰陽消長否泰往來之變謹察君子小人之分而公進退之母為調停之說所誤使忠言日聞聖德日新而天下之人真享富壽康寧之福朝廷之上真見平平蕩蕩之風則衰病之軀老死邱壑無所憾矣如於忠邪之分察之有未明消長之戒信之有未篤而又以一臆利害之私參錯乎其間則今所謂持平者是乃所以深助小人之勢以為君子之病將見彼黨日甚此勢日孤天下之事將有不可為者丞相雖欲奉身而退窮勝事而樂清時亦不得辭後世良史之責矣熹不勝感德之至輒復冒昧言之伏惟恕其狂妄而采其千慮之一得焉

月

是歲與永嘉陳君舉論學

年譜先生往歲聞永嘉陳傅良君舉嘗有詩說以書問之至是遣書來報云來徵詩說年來或與士友言

之未嘗落筆愚見欲以雅頌之音蕭勺羣德訓詁章句付之諸生又謂二十年間聞見異同無從就正間欲以書叩之念長者前有長樂之爭後有臨川之辨至如永康往還動數千言更相切磋未見其益而學者轉相夸毗浸失本旨蓋刻劃太精頗傷簡易矜持已甚反涉吝驕以此益覺書不能宣要須請見究此衷曲耳先生答云嘗謂人之為學若從平實地工循序加功則其目前雖未見日計之益而積累工夫漸見端緒自然不假用意裝點不待用力支撐而聖賢之心義理之實必皆有以見其確然而不可易者至於講論之際心即是口口即是心豈容別生計較依違遷就以為諧俗自便之計耶今人為學既已過高而傷巧是以其說常至於依違遷就而無所分別蓋其胸中未能無纖芥之疑有以致然非獨以避咎之故而後詭於詞也若熹之愚自信已篤向來之辨雖至於遭讒取辱然至於今日此心耿耿猶恨其言之

未盡不足以暢彼此之懷合異同之趣而不敢以為
悔也不識高明何以教之惟盡言無隱使得反覆其
說千萬幸甚老病幽憂死亡無日念此大事非一人
私說一朝淺計而終無面寫之期是以冒致愚悃向
風引領不勝馳情文集又與陳君舉書云前書所扣
未蒙開示然愚悃之未能盡發於言者亦多每恨無
由得遂傾倒以求鐫切近曹器之來訪乃得為道曲
折計其復趨函丈必以布露敢丐高明少垂采釋其
未然者痛摺擊之庶有以得其真是之歸上不失列
聖傳授之統下使天下之為道術者得定於一非細
事也惟執事圖之語錄君舉得書云更望以雅頌之
音消鑠羣惡首章訓詁付之諸生問他如何是雅頌
之音今只有雅頌之詞在更沒理會又去那裏討雅
頌之音硬都只是瞞人又謂某前番不合與林黃中
陸子靜諸人辨以為相與詰難竟無深益益刻劃太
精頗傷易簡矜持已甚反涉吞驕不知更何如方是

深益若孟子之闢楊墨也只得恁地開他說刻劃太
精便只是某不合說得太分曉不似他只恁地含糊
他是理會不得被衆人擁從又不肯道我不識又不
得不說說又不識所以不肯索性開口道只箇是甚
物事又只恁鶻突了又曰他那得似子靜子靜却是
見得箇道理却成一部禪他和禪也識不得孫賀今
永嘉又自說一種學問更沒頭沒尾又不及金溪大
抵都說一載親作話終不說破是箇甚麼然皆以道
義先覺自處以此傳授君舉到湘中一收收盡南軒
門人胡季隨亦從之問學某向見季隨固知其不能
自立其胸中自空空無主人所
以讒聞他人之說便動大英必

文集答葉正則書云向來相見之日甚淺而荷相與
之意甚深中間寓舍并坐移晷觀左右之意若欲有
所言者而免囁嚅不能出口前書疏往來雖復少見
鋒穎而亦未能彼此傾倒以求實是之歸但見士子

傳誦所著書及答問書尺類多籠罩包藏之語不惟他人所不解意者左右亦自未能曉然於心而無所疑也世哀道微以學為諱上下相徇識見議論日益卑下彼既不足言矣而吾黨之為學者又皆草率苟簡未曾畧識道義規模工夫次第便以己見博量湊合撰出一般說話高自標置下視古人及考其實則全是含糊影響之言不敢分明道著實處竊料其心豈無所疑只是已作如此聲勢不可復謂有所不知遂不免一向自瞞強作撐柱只要如此鵲突將去究竟成就得何事業未論後世只今日旁觀便須有人識破未論他人只自家方寸如何得安穩耶如來書所謂在荊州無事看佛書乃知世外瓌奇之說本不能與治道相亂所以參雜辨爭亦是讀者不深考爾此殊可駭不謂正則乃作如此語話也中間得君舉書亦深以講究辨切為不然此蓋無他只是自家不曾見得親切端的不容有毫釐之差處故作此見耳

欲得會面相與劇談庶幾彼此盡情吐露每一箇是處大家講究到底大開眼看覷大開口說話分明去取直截剖判不須得如此遮前掩後似說不說做三日新婦子模樣不亦快哉孟子自許雖行霸王之事而不動其心究其根原乃只在識破誠淫邪遁四種病處今之學者不惟不能識此而其所做家計窠窟乃反在此四種病中便欲將此見識判斷古今議論聖賢豈不誤哉相望千里死亡無日因書聊復一言不識明者以為何如然勿示人恐又起鬧無益而有損也平復答項平父書云中間得葉正則書亦方似此依違籠罩而自處甚高不自知其淺陋殊可憐憫以書告之久不得報恐未必能堪此苦口也子語錄陸子靜分明是禪但却成一箇行戶尚有箇據處如葉正則說則只是教人都曉不得嘗得一書來言世間有一般魁倖底道理自不亂於三綱五常既說不亂三綱五常又說別是箇魁倖底道理却是箇甚麼

物事也是亂道他不說破籠統恁地說以謾人及人
理會得來都無效驗時他又說你是未曉到這裏他
自也不曉得他之說最誤人世間歎人被牠瞞不自
知則義禁正則說話只是杜撰看他進卷可知大畧
沐陽禁正則作文論事全不
知些著實利害只虛論脈

三年壬子六十三歲春二月有旨趣之任復辭并請補

祠秩許之

年譜詔漳州經界議行已久湖南使節事不相
關可疾速之任先生猶以補祠秩為請遂許之
文集辭免湖南運使狀二

始築室于建陽之考亭

年譜先是韋齋嘗過其地愛之書日記曰考亭溪山清邃可以卜居至是卒成韋齋之志遷焉以六月落成而居之榘文集告家廟文云熹罪及不天幼失所怙祇奉遺訓往依諸劉卜葬卜居亦既累歲時移事改存沒未安乃眷此鄉實亦皇考所嘗愛賞而欲卜居之地今既定宅敢仲虔告以妥祖考之靈

冬十二月除知靜江府廣南路經界安撫使辭

文集與留丞相劄子云春間蒙恩復安祠館感戴益不勝言今者曾未逾年又叨除目付以一路軍民之寄此蓋某官愛惜人材不忍使其終身棄於無用之地故以及此而熹哀病益侵精神益耗自度實難冒受以誤使令之意已具狀辭免欲望鈞慈特與將工令熹終滿今任祠祿之後別聽指揮文集辭免知靜江府狀一

是歲孟子要畧成

語錄敬之問看要畧見先生所說孟子皆歸之仁義如說信反以後諸處皆然曰是他見得這道理通透見得裏面本來都無別物事只有箇仁義到得說將出都離這箇不得不是要安排如此孫賀因整要畧謂孟子發明許多道理都盡自此外更無別法恐維這箇先從性看看得這箇物事破了然後看入裏面去終不甚費力要知雖有此數十條是古人已說過不得不與他理會到得做工夫時却不用得許多難得勇猛底人直截便做將去孫賀敬之問要指不取杞柳一章曰此章自分曉無可玩索不用人亦可却是生之謂性一段難曉說得來反恐鶻突故不編入孫賀問孟子首章先剖判箇天理人欲令人曉得其所以不同曰某向時編此書今看來亦不必只孟子

便直恁分曉示人
自是好了陳時

四年癸丑六十四歲春正月有旨趣之任復辭

辭免狀二云右熹正月二十三日準正月七日尚書
省劄子以熹辭免知靜江府恩命正月六日奉聖旨
不許辭免依已降指揮疾速之任熹前狀所陳委曲
詳盡不謂未蒙照察申命益嚴是取昧死復有陳述
伏惟朝廷再為開陳收回誤恩
復還舊秩不勝祈懇激切之至
文集辭免知靜江府狀二

二月差主管南京鴻慶宮

冬十二月除知潭州荆湖南路安撫使辭

年譜或傳是冬使人自金國回敵問南朝朱先生安在答以見已擢用歸白廟堂遂有是除先生以辭遠就近不為無嫌力辭告辭云十國為連師師是寄矧長沙據湖湘上游賜履甚廣視邦選侯尤難其人以爾學古粹深風節峻特可以為世之師仁心仁聞咸惠孚洽可以為世之帥兼是二者往臨藩方聲望所加列城聳服儒先相望士氣方振爾其為朕教之楚俗雖安尚有凋瘵爾其為朕撫之典刑所存奚事多訓時紹熙四年十二月某日中書舍人樓鑰行詞文集與留丞相書云熹迂濶鄙儒多致齟齬相公曾未識其面目乃於秉鈞之初首加拔用到官一年有請必遂如褒贈漳浦高公減免經總制錢之屬皆前日守臣屢請而不得者是相公於熹知之不為不深而於漳之士民愛之不為不厚矣至於經界一事乃獨屢上而不報至其甚不得已而陽許之則又多為疑貳之言以來讒賊之口曾不一年而卒罷之則熹

於是始疑相公所以知熹者不若其於鄉里小兒之
深所以愛夫漳之士民者不如其於瑣瑣姻婭之厚
而匹夫之志固以慨然自知其決不可以復入相公
之門矣是以湖南廣西再命再辭蓋不惟以粗伸己
志亦庶幾陰以解謝臨漳千里狼狽失業之民也今
相公郊居累月一日來歸復首以不肖之姓名言於
上前付以湖南一路之寄聖主以相公之言為重即
使出命君相之恩隆厚若此自當黽勉拜命以稱所
蒙而熹之私心反復思之終以前事有未能忘者夫
宰相以得士為功下士為難而士之所守乃以不自
失為貴今相公之得士如此下士如此已為盛美若
又能容熹使不自失其所守則是古人所謂人有其
寶者亦何必使之回面污行而為終身之羞哉抑今
日之勢天意雖若暫回而恐未固禍機雖若暫息而
恐未除事會之來乃有大於漳州之經界者矣願相
公深以前事為戒公其心遠其慮毋使天下之士賢

於熹者復有所激而不肯出於門牆則熹今日之言猶未為無以報德也語錄過甲寅年見先生聞朋輩說昨歲金人問使人云南朝朱先生出處如何歸白廟堂所以得帥長沙之命

王進

文集辭免知潭州狀一

五年甲寅六十五歲春正月復辭二月有旨趣之任

年譜黃裳為嘉王府翊善自以學不及先生乞召為宮僚王府直講彭龜年亦為大臣言之留正曰正非不知某但其性剛到此不合反為累耳先生方再辭有旨長沙巨屏得賢為重往祇成命毋執謙讓可依已降指揮疾速之任會洞獠侵擾屬郡恐其滋熾遂拜命四月啓行

洪本

文集辭免知潭州狀二

夏五月五日至鎮

年譜在途所次老樨攜扶來觀夾道填擁幾不可行
長沙士子夙知向學及鄰郡數百里間學子雲集先
生誨誘不倦坐席至不能
容溢於戶外士俗惟動

洞獠侵擾屬郡遣使諭降之

年譜徑人蒲來矢出省地作過或薦軍校田昇可用
先生召問之以為可招期以某日不俘以來將斬汝
昇即以數十輩馳往取文書粗若告負者數通自隨
諭以禍福來矢喜聽命遂并其妻子俘以至官給衣
冠引赦
不誅

奏劾將官陸景任

奏狀言潭州東南第八將從事即陸景任病患疴羸不能行立兵官職事難以倚仗欲乞改與宮觀差遣別選材武前來充職庶幾軍務不致廢弛
文集奏劾陸景任狀

祭南軒張公祠

文集祭張敬夫城南祠文

祭南軒墓文

修復嶽麓書院

委教授牒云本州州學之外復置嶽麓書院本為有志之士求師取友以為優游肄業之地故前帥忠肅劉公特因舊基復創新館延請故侍講張公先生往來其間使四方來學之士得以傳道授業解惑焉而

比年以來師道凌夷講論廢息士氣不振議者惜之
當職叨冒假守到官兩月困於簿書未及一往除已
請到醴陵黎君貢士充講書職事與學錄鄭貢士同
行措置外今議別置額外學生十員以處四方遊學
之士其廩給依州學則例更不補試聽候當職考察
搜訪徑行撥入凡使為學者知所當務不專在於區
區課試之間實非小補牒教授及帖書院照會施行
年譜先生窮日之力治郡事甚勞夜則與諸生講論
隨問而答畧無倦色多訓以切己務實毋
厭卑近而慕高遠懇惻至到聞者感動洪本
文集委教授措置獄麓書院牒

申請飛虎軍隸本州節制從之

年譜申教令嚴武備以飛虎軍人為百姓害郡不能
禁且本路別無軍馬惟賴飛虎軍以壯聲勢而乃遙隸

襄陽不便遂

有是請

洪本

文集乞撥飛虎軍隸湖南安撫司劄子

六月申乞放歸田里

年譜時孝宗升遐先生哀慟不能自勝又聞光宗以疾不能執喪中外洶洶益憂懼遂申省乞放歸田里言天下國家所以長久安寧惟賴朝廷三綱五常之教有以建立修明於上然後守藩述職之臣有以稟承宣布於下所以內外相維小大順序雖有彊猾姦宄之人無所逞其志而為亂不然則以一介書生彊而置諸數千百里軍民之上彼亦何所憑恃而能服其衆哉熹雖至愚自知甚審而亦粗嘗竊窺古今治亂安危存亡之變矣誠恐朽鈍之餘不堪今日方面之寄無以近奉大行壽皇聖帝遺誥攀號不逮迷悶頓

絕自覺精力亦難支吾欲望朝廷特賜敷奏放歸田里行狀又草封事極言父子天性不應以小嫌廢舜倫言頗切直會今

上即位不果上

文集乞放歸田里狀

秋七月光宗內禪寧宗即位召赴行在奏事辭

宋史寧宗本紀云七月庚午召秘閣修撰知潭州朱熹詣行在年譜寧宗即位趙汝愚首薦先生及陳傅良有旨赴行在奏事先生行且辭先是蜀人黃裳為嘉州善善講說開導上學頓進一日光宗宣諭云嘉王進學皆卿之力裳謝因進曰若欲進德修業退蹤古先哲王則須尋天下第一人乃可光宗問為誰對曰朱某彭龜年繼為宮僚因講魯莊公不能制其母云母不可制當制其侍御僕從上問此誰之說曰

朱某之說自後每講必問朱某之說云何蓋傾心已久故履位之初首加召用洪行狀上在潛邸聞先生名每恨不得先生為本宮講官至是首召奏事

文集解免召命狀

立忠節廟

年譜東晉王敦之亂湘州刺史譙閔王司馬承起兵討賊不克而死紹興初金人犯順通判潭州事孟彥卿趙民彥督兵迎戰臨陣遇害城陷之日將軍劉玠兵官趙聿之巷戰罵賊不屈而死五人皆以忠節歿於王事而從前未有廟貌乃牒本州於城隍廟內創立祠堂象五人者又考譙王本傳並象其參謀數人立侍左右各五位版記其官職姓名奉祀如法後赴闕奏事特請於朝賜廟額曰忠節本洪

文集乞潭州譙王等廟額狀

考正釋奠禮儀行于郡

年譜先是漳州任內列上釋奠禮儀已條奏得請施行而復格不下至是前太常博士詹元善還為太常少卿始復取往年所被勅命下之本郡吏文重複繁冗幾不可讀且曰屬有大典禮未遑徧下諸州先生以召還奏事行有日矣又苦目病乃力疾躬為鉤校刪剔猥雜定為數條以附州案俾移學官府屬縣且關帥司并下巡內諸州僅畢而行未幾元善補外而奉常亦不復下其書他州矣

洪本

文集書釋奠申明指揮後

八月赴行在

年譜先生行至宜春門人劉黻遮道請見曰先生此行上虛心以待敢問其道何先先生曰今日之事非大更改不足以悅天意服人心必有惡衣服菲飲食卑宮室之志而不敢以天子之位為樂然後庶幾積誠盡孝默通潛格天人和同方可有為其事大其體重以言乎輔贊之功則非吾之所任以言乎啓沃之道則非吾之敢當然天下無不可為之時人主無不可進之善以天子之命召藩臣當不俟駕而往吾知竭吾誠盡吾力耳外此非吾所能預計也

洪本

除煥章閣待制兼侍講再辭不允仍趣前來供職

宋史寧宗本紀云八月癸巳以朱熹為煥章閣待制兼侍講年譜先生辭奏事之命兩旬不報遂東歸道中忽被除命以為超躐不次之除難以祇受乞以舊官奉祠辭者至再且云陛下嗣位之初方將一新庶

政所宜愛惜名器不可輕以假人若使僥倖之門一
開豈可復塞至於博延儒臣專意講學蓋將求所以
深得親惟者為建極導民之本思所以大振朝綱者
為防微慮速之圖顧問之臣實資輔養用人或謬所
係非輕蓋先生在道聞南內朝禮尚闕近習已有用
事者故預有是言告詞云朕初承大統未暇他圖
首開經帷詳延學士眷儒宗之在外頒召節以趣歸
徑登從班以重吾道其位朱熹發六經之蘊窮百氏
之源其在兩朝未為不用至今四海猶謂多奇擢之
次對之班處以邇英之列若程頤之在元祐若尹焞
之於紹興副吾尊德樂義之誠究爾正心誠意之說
豈惟慰滿於士論且將增益於朕躬非不知政化方
行師垣有賴試望之於馮翊不如寘之本朝召賈傳
於長沙自當接以前席慰茲渴想望爾逸驅時紹熙
五年八月某日黃籛行詞文集奏狀二云臣昨辭召
命已被疾速前來供職指揮今茲祈免詔除又奉不

允之詔不敢更有留滯見已一面起離信州前路聽候處分答蔡季通書云至臨江忽被改除之命起越非常不敢當也始者猶欲且歸里中未決今既如此又得朝士書皆云召旨乃出上意親批且屢問及不可不來又云主上虛心好學增置講員廣立程課深有願治之意果如此實國家萬萬無疆之休義不可不往遂自臨川改趨信上以俟辭免之報

文集辭免煥章閣待制侍講奏狀一

奏狀二

九月奏乞帶元官職奏事

奏狀云次對異恩無故超授在臣私分實難自安是以傍徨未敢實受今來復準前項聖旨已即日起發前去外欲乞到日許臣且依七月十一日已降指揮帶元官職詣闕奏事所有新除却俟面奏辭免別聽

處分

文集辭免煥章閣待制侍講乞且帶元官職詣闕奏
狀二

晦丁亥至自潭州次于郊外

年譜先是先生行至上饒聞以內批逐首相留丞相
建有憂色學者問其故先生曰大臣進退亦當存其
體貌豈宜如此或謂此蓋廟堂之意先生曰何不風
其請去而後許之上新立豈可導之使輕逐大臣耶
及至六和塔永嘉諸賢俱集各陳所欲施行之策紛
然不決先生曰彼方為几我方為肉何暇議及此哉蓋
是時近習用事御筆指揮
皆已有端故先生憂之

冬十月己丑入國門申省乞帶元官職奏事

文集申省狀

辛卯奏事行宮便殿

年譜首言乃者天運艱難國有大咎天變為之見於
上地變為之作於下人情為之哀恫怫鬱而皆有離
叛散亂之心此所謂天下之大變而不可以常理處
焉者也太皇太后躬定大策皇帝陛下寅紹丕圖不
越須臾之頃而鄉之危者安離者合天下之勢翕然
而定亦可謂處之以權而不失其正矣然自頃至
今亦既三月而天變未盡消地變未盡弭君親之心
未盡懽學士大夫羣黎百姓或反不能無疑於逆順
名實之際至於禍亂之本又已伏於冥冥之中特待
時而動耳臣雖至愚亦知竊為陛下憂之然猶有可
可護者亦曰陛下之心前日未嘗有求位之計今日
未嘗忘思親之懷而已爾此則所謂道心微妙之全

體天理發用之本然而所以行權而不失其正之根本也誠即是心以充之則孔子所謂求仁得仁而無怨孟子所謂終身所然樂而忘天下者有以知陛下之不難矣借曰天命神器不可以無傳宗廟社稷不可以無奉則轉禍為福易危為安亦豈可以舍此而他求哉充吾未嘗求位之心則可以盡吾負罪引慝之誠充吾未嘗忘親之心則可以致吾溫清定省之禮始終不越乎此而大倫可正大本可立矣陛下誠能動心忍性深自抑隕所以自處常如前日未嘗有位之時內自宮掖燕私之奉服食器用之須不敢一毫有加於潛邸之舊外至百辟多儀之享恩澤匪頒之式不敢一日而全享乎萬乘之尊專務積其誠意期以格乎親心然後濬發德音痛自克責嚴飭羽衛益勤問安視膳之行十日一至而不得見則繼以五日一至於不得見則繼以三日三日而不得見則二日而一至於無一日而不一至焉俯伏寢

門怨慕號泣雖勞且辱有所不憚然而親心猶未底
豫慈愛猶未復初逆順名實之疑不渙然而永釋則
臣不信也若夫災異之變禍亂之機有未盡去則又
在陛下凝神恭默深監古先日與大臣講求政理可
否相濟唯是之從必使發號施令無一不出乎朝廷
退人材無一不合乎公論不為偏聽以啟私門則
聖德日新聖治日起而天人之應不得違釁孽之萌
不得作矣今日之計莫大於此惟深留聖意而亟圖
之次言為學之道莫先於窮理窮理之要必在於讀
書讀書之法莫貴於循序而致精而致精之本則又
在於居敬而持志此不易之理也夫天下之事莫不
有理為君臣者有君臣之理為父子者有父子之理
為夫婦為兄弟為朋友以至於出入起居應事接物
之際亦莫不各有理焉有以窮之則自君臣之大以
至事物之微莫不知其所以然與其所當然而亡纖
芥之疑善則從之惡則去之而無毫髮之累此為學

所以莫先於窮理也至論天下之理則要妙精微各有攸當亘古亘今不可移易唯古之聖人為能盡之而其所行所言無不可為天下後世不易之大法其餘則順之者為君子而吉背之者為小人而凶吉之大者則能保四海而可以為法凶之甚者則不能保其身而可以為戒是其粲然之跡必然之效蓋莫不具於經訓史冊之中欲窮天下之理而不即是以求之則是正牆面而立爾此窮理所以必在乎讀書也若夫讀書則其不好之者固怠忽間斷而無所成矣其好之者又不免乎貪多而務廣往往未啓其端而遽已欲探其終未究乎此而忽已志在乎彼是以雖復終日勤勞不得休息而意緒怠忽常若有所奔趨迫逐而無從容涵泳之樂是又安能深信自得常久不厭以異於彼之急忽間斷而無所成者哉孔子所謂欲速則不達孟子所謂進銳者退速正謂此也誠能鑒此而有以反之則心潛於一久而不移而所讀之

書文意接連血脉貫通自然漸漬浹洽心與理會而善之為勸者深惡之為戒者切矣此循序致精所以為讀書之法也若夫致精之本則在於心而心之為物至虛至靈神妙不測常為一身之主以提萬事之綱而不可有頃刻之不存者也一不自覺而馳騁飛揚以徇物欲於軀殼之外則一身無主萬事無綱雖其俯仰顧盼之間蓋已不自覺其身之所在而況能反覆聖言參考事物以求義理至當之歸乎孔子所謂君子不重則不威學則不固孟子所謂學問之道無他求其放心而已矣者正謂此也誠能嚴恭寅畏常存此心使其終日儼然不為物欲之所侵亂則以之讀書以之觀理將無所往而不通以之應事以之接物將無所處而不當矣此居敬持志所以為讀書之本也此數語者皆愚臣平生為學艱難辛苦已試之效竊意聖賢復生所以教人不過如此不獨布衣韋帶之士所當從事蓋雖帝王之學殆亦無以易之

伏惟聖明深賜省覽試以其說驗之於身蚤寤晨興無忘今日之志而自強不息以緝熙於光明於以著明人主講學之效卓然為萬世帝王之標準則臣雖退伏田野與世長辭有餘榮矣又言湖南歲計入少出多官吏往往苟逭目前多方趣辦尚且入不支出公私俱困若更差到諸班換授歸正雜流補官之人復有增加愈見逼迫無以為計欲望聖慈特詔本路帥臣監司諸郡並行均節痛加退減指定奏聞庶幾州得以恤其縣縣得以寬其民而有不奉詔者亦無以逃其罪矣又言湖南州郡從前邊防全無措置因令州守臣條畫到移置寨柵增撥戍兵利害數條已經具奏欲望明詔大臣早賜處分俾所司公共相度從長區處庶為一分永久之利又言潭州城壁剝落摧圯乞行下計度修築以為永久不虞之備

面辭待制侍講不允

文集甲寅行宮便殿奏劄一

奏劄二

奏劄

三 奏劄四

奏劄五

辭免待制侍講面

奏劄子

壬辰申省辭待制職名乞改作說書差遣

中省言昨具劄子面奏辭免新除奉旨不允熹已仰體聖意不敢力辭講筵職事第以未得進說先受厚恩萬一異時未有報効而疾病發作不可支吾遂竊侍從職名而去則熹之愚死有餘罪欲望朝廷特為開陳與免待制職名改作說書差遣容熹即日拜命供職不敢數具奏狀上勞聖覽謹具狀申尚書省文集辭免待制改作說書狀

丁酉奉御筆不允乃拜命係銜供職

行狀既對面辭待制侍講不許翌日又辭待制職名
改作說書差遣上手札卿經術淵源正資勸講次對
之職勿復牢辭以副朕崇儒重道之意遂拜命文集
謝御筆以次對係銜供職奏狀云右臣十月初十日
準御前降到御筆一封付臣令臣勿復牢辭次對之
職臣昨以新除恩命超躡異常累具辭免日望開允
豈意仰勤聖主親御翰墨俯賜褒諭令勿牢辭跡賤
小臣分不當得拜受伏讀不勝恐懼謹已仰遵聖訓
係銜供職外謹具
奏聞伏乞睿照

上孝宗山陵議狀

行狀趙彥逾按視孝宗山陵以為土肉淺薄掘深五
尺下有水石旋改新穴比舊僅高尺餘孫逢吉覆按
亦乞少寬月日別求吉兆有旨集議臺史憚之議遂
中寢先生竟上議狀言壽皇聖德神功宜得吉土以

奉衣冠之藏當廣求術士博訪名山不宜偏信臺史
周上誤國之言固執紹興坐南向北之說委之水泉
砂礫之中殘破
浮淺之地不報
文集山陵議狀

辛丑受詔進講太學

年譜庚子內引辛丑進講故事講筵每遇隻日早晚
進講及至當日或值假故即行權罷又大寒大暑亦
係罷講月分先生奏乞除朔望旬休及過宮日外不
以寒暑隻隻月日諸色假故并令逐日早晚進講從
之先生每講務積誠意以感悟上心以平日所論
著者敷陳開析坦然明白可舉而行講畢有可以開
益上德者罄竭無隱
上亦虛心嘉納焉

文集乞不以假故逐日進講劄子

差兼實錄院同修撰再辭不允

文集辭免兼實錄院同修撰奏狀一

奏狀二

更化覃恩授朝請郎甲辰賜紫金魚袋

年譜告詞云學先王之道而明於當世之務三仕三已義不苟合天下高之蓋累朝之所嘉歎而不忘也長沙謀帥彊為時起肆予初政式邁其歸於以勸講朕將虛已納焉爰因大賚序進厥秩雖曰舊章亦冀樂告時紹熙五年十月十七日中書舍人陳傳良行詞

奏乞令後省看詳封事

年譜時以雷雨之異下詔求言因奏登極之初已下
明詔獻言者衆未聞一有施行今曰求言殆成虛語
乞今後省官看詳擇其善者條上取旨以次施行則
求言之詔不為具文庶聞者知勸直言日聞十七日
奉旨差沈有開劉光祖限十日內看詳開奏
寧宗本紀云甲辰以朱熹言趣後省看詳應詔封事
文集乞差官看詳封事劉子
乞令看詳封事官
而奏劉子

奏乞討論嫡孫承重之服

劉子云禮經勅令子為父嫡孫承重為祖父皆斬衰
三年蓋嫡子當為父後而不能襲位以執喪則嫡孫
繼統以代之執喪義當然也然自漢大短喪之後歷
世因之天子遂無三年之喪為父且然則嫡孫承重
從可知已至尊壽聖皇帝至性自天孝誠內發易月
之外猶執通喪朝衣朝冠皆以大布起越千古甚盛

德也間者遺誥初頒太上皇帝偶違康豫不能躬就
喪次陛下實以世嫡之重仰承大統則所謂承重之
服著在禮律所宜一遵壽皇已行之法易月之外且
以布衣布冠視朝聽政以代太上皇帝躬執三年之喪
而一時倉卒不及詳議遂用漆紗淺黃之服不惟上
違禮律且使壽皇已行之禮舉而復墜臣竊痛之然
既往之失不及追改惟有將來啟殯發引禮當復用
初喪之服則其變除之節尚有可議欲望陛下仰稽
壽皇聖孝成法明詔禮官稽攷禮律預行指定其官
吏軍民男女方喪之禮亦宜稍為之制勿使過為華
靡庶有以著於君臣之義實天下萬世之幸宋史寧
宗本紀云十一月辛亥詔行孝宗三年喪制命禮官
條具典禮以聞禮志云初高宗之喪孝宗為三年
服及孝宗之喪有司請於易月之外用漆紗淺黃之
制蓋循紹興以前之舊朱熹初至不以為然奏言已
往之失不及追改唯有將來啟攢發引禮當復用初

喪之服則其變除之節尚有可議望明詔禮官稽考禮律豫行指定其官吏軍民方喪之服亦宜稍為之制勿使肆為華靡其後詔中外百官皆以涼衫視事益用此也年譜奏上詔禮官討論後不果行

文集乞討論喪服劄子

瑞慶節奏乞却賀表並乞三年內賀表並免

年譜瑞慶聖節前一日百官詣行宮便殿稱賀先生欲不出不可乃草劄子立班殿進乞權免稱賀表亦不收接三年之內凡有稱賀事並依此例有旨却賀表不受宋史寧宗本紀云丙午以朱熹奏請却瑞慶表

節賀表

文集乞瑞慶節不受賀劄子

乙巳晚講

庚戌講筵留身面奏四事

年譜時論者以為上未還大內則名體不正而疑議
生金使且來或有窺伺有旨修葺舊東宮為屋三數
百間欲徙居之而諫臣黃度將論近習遽以特批逐
之先生不勝憂慮乃具奏四事言臣之所言其最大
者則勸陛下凡百自奉深務抑損自宮闈之私居處
服用且如潛邸之舊以至外庭禮數僕御恩澤未
可遽然全享萬乘之尊庶幾有以感格親心早遂晨
昏定省之願以為陛下必垂開納而數日來乃聞有
旨修葺舊日東宮為屋三數百間外議皆謂陛下意
欲速成早遂移蹕以為便安之計不惟未能抑損乃
是過有增加臣不知此果出於陛下之心大臣之議
軍民之願耶抑亦左右近習倡為此說以誤陛下而

欲因以遂其姦心也臣恐不惟上帝震怒災異數出正當恐懼修省之時不當興此大役以咈譴告警動之意亦恐畿甸百姓饑餓流離陷於死亡之際忽見朝廷正用此時大興土木修造宮室但以適己自奉為事而無矜惻憫憐之心或能怨望忿切以生他變不惟無以感格太上皇帝之心以致未有進見之期亦恐壽皇在殯因山未卜几筵之奉不容少弛太皇太后皇太后皆以尊老之年煢然在憂苦之中晨昏之養尤不可闕而四方之人但見陛下亟欲大治宮室速得成就一旦翩然委而去之以就安便六軍萬民之心必又將有扼腕而不平者矣前鑒未遠甚可懼也至於一離尊親之側輕去倚廬之次深宮永巷園囿池臺耳目之娛雜然而進臣又竊恐陛下之心未易當此紛華盛麗之熒惑感移雖欲日親儒士講求經訓以正厥事而進德修業亦將有所不暇矣此又臣之所大懼也至於壽康定省之禮則臣嘗言之

矣而其意有未盡也今聞過日一再過宮亦未得見而不亟為之慮如臣所謂下詔自責頗日繼往者顧乃逶迤舒緩無異尋常之時泛然而往泛然而歸太上皇帝聞之必以為此徒備禮而來實無必求見我之意其深閉固拒而不肯見固亦宜矣又聞太上皇后懼忤太上皇帝之意不欲其聞太上之稱入不欲其聞內禪之說此又慮之過者殊不知若但一向如此而不為宛轉方便使太上皇帝灼知陛下所以不得已而即位者但欲上安宗社下慰軍民姑以待己之勞而非敢遽享至尊之奉則父子之間上怒怒而下憂懼將何時而已乎父子天倫三綱所繫不惟陛下之深心所未安而四方觀聽殊不為美久而不圖亦將有借其名以造謗生事者此又臣之所大懼也至於朝廷紀綱尤所當嚴上自人主以下至於百執事各有職業不可相侵蓋君雖以制命為職然必謀之大臣參之給舍使之熟識以求公議之所在然後

揚於王庭明出命令而公行之是以朝廷尊嚴命令
詳審雖有不當天亦皆曉然知其謬之出於某人
而人主不至獨任其責臣下欲議之者亦得以極意
盡言而無所憚此古今之常理亦祖宗之家法也今
者陛下即位未能旬月而進退宰執移易臺諫甚者
方驟進而忽退之皆出於陛下之獨斷而大臣不與
謀給舍不及議正使實出於陛下之獨斷而其事悉
當於理亦非為治之體以啓將來之弊況中外傳聞
無不疑惑皆謂左右或竊其柄而其所行又未能盡
允於公議乎此弊不革臣恐名為獨斷而主威不免
於下移欲以求治而反不免於致亂蓋自隆興以來
已有此失臣嘗再三深為壽皇論之非獨今日之憂
也尚賴壽皇聖性聰明更練世事故於此輩雖以驅
使之故稍有假借實亦陰有以制之未至全墮其計
然積習成風貽患於後其害已有不可勝言者如陳
源袁佐之流皆陛下所親見也奈何又欲襲其跡而

蹈之乎且陛下自視聰明剛斷孰與壽皇更練通達孰與壽皇壽皇尚不能制之於前而陛下乃欲制之於後臣恐其為患之益深非但前日而已此又臣之所大懼也至於殯宮之卜偏聽臺史膠固謬妄之言墮其交結眩惑之計而不復廣詢述人以求吉地但欲於佑思諸陵之傍僭那遷就苟且了當既不為壽皇體魄安寧之慮又不為宗社血食久遠之圖則自宰執侍從以至軍民皆知其非而不敢力爭夫以壽皇之豐功盛烈百世不忘而所以葬之如此其草草也此豈不又大拂天人之心以致變異之頻仍而貽患於無窮乎此又臣之所大懼也凡此四懼皆非小故臣願陛下深察愚言而反之於心明詔大臣首罷修葺東宮之役而以其工料回就慈福重華之間草創寢殿一二十間使粗可居又於宮門之外草創供奉宿衛之廬數十間勿使其有偏仄暴露之苦如是則上有以感格太上皇帝之心而速南內進見之期

又有以致壽皇几筵之奉而盡兩宮晨昏之禮下有以塞羣下窺覲眩惑之姦而慰斯民饑餓流離之歎此一事也若夫過宮之計則臣又願陛下下詔自責減省興衛入宮之後暫變服色如唐肅宗之改服紫袍執控馮前者預詔近屬尊行之賢使之先入首白太上皇后以臣前所陳宛轉方便之說然後隨之而入望見太上皇帝即當流涕伏地抱膝吮乳以伸負罪引慝之誠而太上皇后宗戚貴臣左右環擁更進譬諭解釋之詞則太上皇帝雖有忿怒之情亦且霍然雲消霧散而惟意浹洽矣此二事也若夫朝廷之紀綱則臣又願陛下深詔左右勿預朝政但使朝廷尊嚴紀綱振肅而國家有泰山之安則此等自然不失富貴長久之計其實有勲庸而所得褒賞未愜衆論者亦詔大臣公議其事稽考令典厚報其勞而凡號令之弛張人才之進退則一委之二三大臣使之反覆較量勿徇己見酌取公論奏而行之批旨宣行

不須奏覆但未令尚書省施行先送後省審覆有不
當者限以當日便行繳駁如更有疑則詔大臣與繳
駁之官當晚入朝面議于前互相論難擇其善者稱
制臨決則不惟近習不得干預朝權大臣不得專任
己私而陛下亦得以益明習天下之事而無所疑於
得失之算矣此三事也若夫山陵之卜則臣前日嘗
以議狀進呈近日又與同列連名具奏今更不敢頻
煩聖聽亦望特宣大臣使詳臣等前後所論而決其
可否於立談之間先寬七月之期次黜臺史之說別
求草澤以營新宮使壽皇之遺體得安於內則宗社
生靈皆蒙福於外矣此四事也凡此四事皆今日最
急之務切乞留神反覆思慮斷而行之以答天變以
慰人心上以彰聖主用人求諫之實下以申小臣愛
君愛國之忠則臣不勝千萬大幸上為之感動然卒
無所
施行

文集講筵留身面陳四事劄子

閏十月戊午朔晚講次日編次講章以進

年譜是日講至盤銘日新因論湯有盤銘武王有丹
書皆人主憂勤警戒之意先生講求數次復編次成
帙取旨以入上喜且令點句以來他日請問上曰宮
中嘗讀之其要在求放心耳先生頓首謝先生知上
有意於學因復以劄子勉上進德其畧言願陛下日
用之間語默動靜必求放心以為之本而於玩經觀
史親近儒學已用力處益用力焉數召大臣切劘治
道俾陳今日要急之務畧如仁祖開天章閣故事至
如羣臣進對亦賜溫顏反復詢訪以求政事之得失
民情之休戚而又因以察其人材之邪正短長庶於
天下之事各得其理經歷詳盡浹貫通曉明日間
志氣日彊德聲日聞治效日著則堯舜湯武之盛不

過如是不宜妄自菲薄而不復以古之聖賢自期也
先生退謂門人曰上可與為善願常得賢者輔導天

下有望

矣

本洪

庚申早講辛酉晚講

上諭災異劄子

劄子云今月五日夜漏方下五六刻間都城之內忽
有黑烟四塞草氣襲人咫尺之間不辨人物著於面
目皆為沙土此為陰聚包陽不和而散之象臣竊見
焉益嘗聞之商之中宗高宗遇災而懼修德正事故
能變災為祥伏願陛下視以為法克已自新早夜思
省舉心動念出言行事之際常若皇天上帝臨之在
上宗社生靈守之在旁懔懔然不敢復使一毫私意
萌於其間以煩譴告而又中敕中外大小之臣同寅

欽定四庫全書

朱子年譜
卷四

三

協恭日夕謀議以求天意之所在而交
修焉則庶乎災官日去而福祿日來矣

文集論災異劄子

甲子上廟祧議是日在告乙丑直日准告封婺源縣開
國男食邑三百戶丁卯宣引入對

年譜孝宗將祔廟禮官孫逢吉許及之曾三復等初
請祧宣祖而祔孝宗繼復有請並祧僖宣二祖而奉
太祖居第一室祫享則正東鄉之位乞議祧主所歸
者時宰相趙汝愚素主此說諸儒給舍樓鑰陳傅良
輩皆附和之癸亥當集議先生度難以口舌爭乃辭
疾不赴而入議狀宰相不聽臺諫因乞且依禮官初
議樓鑰獨乞主並祧之說丙寅得旨來日內引丁卯
入對賜食上問外事人才畢請宣引之旨上於榻後

取大書一卷曰此卿所奏廟議也可細陳其說初先生既被旨恐上必問及乃取所論畫為圖本貼說詳盡至是出以奏陳久之上再三稱善且曰僖祖乃國家始祖自不當祧高宗即位時不當祧壽皇即位時亦不曾祧太上即位時亦不曾祧今日豈可容易可於榻前撰數語俟徑批出施行先生方慙內批之弊因乞降出劄子再令臣僚集議上亦然之既退即以上意喻廟堂則聞已毀撤僖宣廟而更創別廟以祀僖順翼宣四祖矣自太祖皇帝首尊四祖之廟治平間議者以世數寢遠請遷僖祖於夾室後王安石等奏僖祖有廟與稷契無異請復其舊趙汝遇既以王安石之論為非待從之臣多附和其說吏部尚書鄭僑欲且祧宣祖而祔孝宗先生謂神宗復奉僖祖以為始祖已為得禮之正而合於人心所謂有其舉之莫敢廢之者乎異議之徒忌其軋已借以求勝事竟不行天下至今恨之

洪

行狀會孝宗祔廟議宗廟

欽定四庫全書

朱子年譜
卷四

三

迭毀之次有請並桃僖宣二祖奉太祖居第一室裕
祭則正東向之位有旨集議僖順翼宣四祖桃主宜
有所歸自太祖皇帝首尊四祖之廟以僖祖為四祖
之首治平間議者以世數浸遠請遷僖祖於夾室未
及數年王安石等奏僖祖有廟與稷契無異請復其
舊詔從之時相雅不以熙寧復祀僖祖為是先生度
難以口舌爭遂移疾上議狀既上廟堂持之不以聞
即毀撤僖宣廟堂更創別廟以奉四祖宰相既有所
偏主樓鑰陳傅良又復牽合裝綴以附其說先生所
議頗達上聽忽有旨召赴內殿奏事因節畧狀文為
劄子畫圖以進上然之且曰僖祖國家始祖高宗孝
宗太上皇帝帝不曾遷今日豈敢輕議欲令先生於榻
前撰數語以御批直罷其事先生方憊內批之弊因
言乞降出劄子再令臣僚集議既退復以上意諭廟
堂而事竟不行經生學士知禮者皆是先生
一時異議之徒忌其軋已權姦遂從而乘之

文集桃廟議狀並圖
議桃廟劄子
面奏桃廟劄子並圖
進議詔意

戊辰入史院

語錄實錄院畧無統記修撰官三員檢討官四員各
欲著撰不相統攝所修前後往往不相應先生嘗與
衆議欲以事目分之譬之六部吏部專編差除禮部
專編典禮刑部專編刑法須依次序編排各具首末
然後類聚為書方有條理又如一事而記載不同者
須置簿抄出與衆會議然後去取庶幾存得總底在
唯葉正則不從官時葉為檢討今當於史院置六房吏
各專掌本房之事如周禮官屬下所謂史幾人者即
是此類如吏房有某注差刑房有某刑獄戶房有某
財賦皆各有冊系日月而書其吏房有事涉刑獄則
關過刑房刑房有事涉財賦則關過戶房逐月接續
為書吏官一閱則條目具列可以依據又以合立傳

之人立其姓名於轉運司令下諸州索逐人之行狀事實墓誌等文字專委一官掌之逐月送付史院如此然後有可下筆處及異日史成之後五房書亦各存之以備漏落

陳淳

庚午面對乙亥直日

丙子晚講是日御批除宮觀戊寅付下附奏謝申省乞放謝辭遂行

年譜丙子晚講留身申言前所奏四事疏乞賜施行既退即降御批朕憫卿耆艾方此隆冬恐難立講已除卿宮觀可知悉宰相趙汝愚留御劄固諫上不省汝愚因求罷政不許越二日戊寅韓侂胄遣內侍王德誥封內批付下先生即附奏謝仍申省乞放謝辭得旨免謝出靈芝寺遂行中書舍人陳傅良起居郎

劉光祖起居舍人鄧驛御史吳獵吏部侍郎孫逢吉
登聞鼓院游仲鴻給事中樓鑰交章留之皆不報本洪
他日工部侍郎黃艾因對問所以逐朱某之驟工曰
初除某經筵爾今乃事事欲與聞吏部侍郎孫逢吉
亦因講權輿之詩反復以諷工曰朱某所言多不可
用宋史寧宗本紀云戊寅侍講朱熹以工疏忤韓侂
罷

文集謝御筆與宮觀奏狀

乞放謝解狀

壬午除寶文閣待制與州郡差遣辭尋除知江陵府荆
湖北路安撫使辭並乞追還待制職名

行狀除寶文閣待制與州郡差遣力辭尋除知江陵
府又力辭仍乞追還新舊職名年譜有旨除寶文閣

待制與州郡差遣力辭遂除知

江陵府辭並辭新舊職名不允

文集辭免寶文閣待制與郡狀

辭免兩次除授

待制職名及知江陵府奏狀

年譜初上之立也宰相趙汝愚求能通意於長信宮

者知閣門事韓侂冑自詭於太皇太后親屬也請効力

遣入白不許出過內侍闕禮於門告之故禮請獨入

泣涕固請太皇太后許之乃命復呼侂冑入使諭意

廟堂其論遂定侂冑自謂有定策功且依託肺腑出

入宮掖居中用事先生離長沙已聞之即惕然以為

憂因辭免職名已檄寓其意及進見再三面陳之又

約吏部彭龜年請對白發其姦龜年出護使客侂冑

益得志時丞相方收召四方之士聚於本朝海內引

領以觀新政而事已多從中出先生既屢言於上又

數以手書遣生徒密白丞相當以厚賞酬其勞勿使

得預朝政且有分界恨立紀綱防微杜漸謹不可忽

之語丞相方謂其易制所倚以為腹心謀事之人又
皆持祿苟安無復遠慮先生獨懷忠憤因講畢奏疏
極言之侂冑大怒陰與其黨謀先去其為首者則其
餘去之易耳乃於禁中為優戲以熒惑上聽會先生
急於致君知無不言言無不切頗見嚴憚而一時爭
名之流亦潛有恭間之心由是侂冑之計遂行及講
筵留身再乞施行前疏則內批徑下先生既去國彭
龜年遂攻侂冑因奏曰政緣陛下近日逐得朱某太
暴故亦欲陛下逐去此小人既而省劄直批龜年與
郡侂冑由此聲勢益張羣險附和并疑及參相視正
士如深仇末冠之
禍蓋始此云

洪本

十一月戊戌至玉山講學于縣庠

年譜邑宰司馬邁請為諸生講說先生辭不獲乃就
縣庠賓位因學者所請問而發明道要聞者興起邁

刻講義一篇以傳於世此乃先生
晚年親切之訓讀者其深味之本

丁未還考亭

十二月詔依舊煥章閣待制提舉南京鴻慶宮辭

先生拜祠命仍

辭待制職名

文集乞退還煥章閣待制奏狀一

奏狀二

竹林精舍成

年譜先生既歸學者益衆至是精舍落成率諸生行
釋菜之禮於先聖先師以告成事後精舍更名曰滄州
文集滄州精舍告先聖文

慶元元年乙卯六十六歲春三月復辭舊職名并以議

廟祧自劾

三月三日准省劄以乞退還煥章閣待制職名奉聖旨不允因復力辭并以前輒議廟祧不合乞收還誤恩是月二十八日奉旨次對之職除授已久與廟議初不相闕可依已降指揮不得再有陳請文集乞追還待制職名奏狀三

磨勘轉朝奉大夫

年譜先是吏部取會磨勘至是轉朝奉大夫本洪奏狀貼黃云蒙吏部降到告命磨勘轉官即已謝恩祇受年譜告詞云勅登崇俊良固欲符於衆望丕視功載自難廢於彛章雖吾法從之莫亦用欽遷之典

其位受才宏遠造道精醇舉明主於三代之隆夙懷此志以六經為諸儒之倡務淑斯人爵每見於辭榮節素高於難進載稽史考履涉文階積久以致官恐未免如昔人之議舉賢不待次當有以徇天下之公其體朕心勿忘猶告時慶元元年

三月某日中書舍人鄧驛行詞

夏五月復辭職名并乞致仕

年譜初韓侂胄即欲并逐趙相而難其詞及是誣以不軌竄永州中外震駭大權一歸侂胄矣侂胄本武人志在招權納賄士大夫嗜利無耻或素為清議所擯者乃教以除去異己者然後可以肆志而莫予連陰疏名授之俾以次斥逐或更道學之名曰偽學蓋謂貪黷放肆乃人真情其廉潔好修者皆偽也於是羣小附和以攻偽于進者蠶起而太府寺丞呂祖儉以論救丞相貶韶州先生自以蒙累朝知遇之恩且

尚帶從臣職名義不容默乃草封事數萬言極陳姦邪蔽主之禍因以明丞相之冤子弟諸生更進迭諫以為必且賈禍先生不聽蔡元定入諫請以著決之遇遯之家人先生默然退取奏橐焚之更號遯翁遂以疾丐休致云別集答劉德修書云病中痊痊字疑誤發狂疾欲舒憤懣一訴穹蒼既復自疑因以易箠之得遯之家人為遯尾好遯之占遂亟焚檮黜舌然胸中猶勃勃不能已也餘千數日前得書處之甚適亦甚不易只去歲忙亂中得其書字畫言語皆晏然如平日固已服其有定力矣某挂冠之請人尚未還而小報已不允勢須再請但得冷撰舊秩亦可以已矣不敗其必悉從也殘暑未衰萬萬以時自重文集中建寧府乞保明致仕狀乞遲還待制職名及守本官致仕奏狀四

秋七月復以議永阜殯陵自劾

奏狀言臣累具奏辭免職名並乞致仕奉聖旨辭職謝事非朕優賢之意不得再有陳請臣已恭稟聖訓未敢再瀾宸聰所辭職名亦不敢再祈避免然伏念向嘗妄議永阜殯宮今小大之臣曾議此者皆已次第降黜而臣以所入文字不曾付外是致漏網豈可隱匿不言冒竊寵榮伏望聖明付之司敗以肅邦刑有旨朱熹無罪可待餘依已降指揮

文集乞還還待制職名並自劾不合妄議永阜殯陵事奏狀五

冬十一月復辭職名

奏狀言臣本意止為已罷講官不敢復帶侍從職名而於其間三次奏狀乃因它事忘其前語今始覺前日之謬不敢再有它說伏望照臣去年申省及第一次第二次辭免奏狀早賜施行使臣得以本官仍奉

香火屏伏田畝以終餘年貼黃言去歲初除之日已
冒疏封錫服之寵封贈廕補之澤及用檢舉磨勘轉
官皆為己受從臣恩數
並乞賜處分討論改正
文集乞追還待制職名奏狀六

十二月詔依舊秘閣修撰提舉南京鴻慶宮

年譜告詞云從欲者聖人之仁尚譙者君子之行眷
我執經之老辭夫次對之榮既諒忱誠其碩茂命以
爾心耽墳典性樂邱樊被累朝之特招稱疾屢矣於
十連而趣召肯起幡然既陪東學之遊兼侍西清之
遽見卿幾晚方善桓榮之說書高論未聞遽若貢生
之懷土仍夫華職秩以真祠益彰優老之風且示隆
儒之意逮茲累歲始復有陳前受之是今受之非誰
能無感大遜如慢小遜如偽夫豈其然顧而務徇於

名高在我豈輕於爵馭俾解禁嚴之直復居論著之
聯雖雅志之勉從在至懷而良咈噫厭承明勞侍從
既迷持橐之班歸鄉里受生徒往究專門之業其祇
予訓用蹈於中可依舊秘閣修撰宮觀差遣慶元元
年十二月某日中書
舍人傅伯壽行詞

二年丙辰六十七歲春二月申乞改正已受從官恩數

中省言元奏貼黃內稱疏封錫服封贈廢補磨勘轉
官皆為已受從官恩數乞賜改正未奉進士欲乞朝
廷特為數奏檢照條例逐一
討論悉行改正庶安愚分

文集乞改正已受過從官恩數狀

冬十二月落職罷祠

年譜先是臺臣擊偽學既榜朝堂未幾張貴模指論
太極圖說之非省闡聞之知舉葉倪劉等奏論文弊
復言偽學之魁以匹夫竊人主之柄鼓動天下故文
風未能丕變乞將語錄之類並行除毀是科取士稍
涉義理者悉見黜落六經語孟大學中庸之書為世
大禁士子避時所忌大氣日卑臺諫洵爭欲以先
生為奇貨門人楊道夫聞鄉曲射利者多撰造事跡
以投合言者之意亟以書告先生報曰死生禍福久
已置之度外不煩過慮久之森人相顧不敢發獨胡
絃草疏將上會遷去不果沈繼祖以追論伊川得為
察官絃以蒙授之繼祖銳於進取謂立可致富貴遂
奏乞褫職罷祠從之洪本蔡元定隱居不仕亦特編管
道州善類重足以立李本宋史胡絃傳云絃未達時嘗
謁朱熹於建安熹待學子惟脫粟飯遇絃不能異也
絃不悅語人曰此非人情隻難尊酒山中未為乏也
遂亡去及是為監察御史遂劾趙汝愚且詆其引用

朱熹為偽學罪首汝愚遂謫永州汝愚初抵罪去國
搢紳大夫與夫學校之士皆憤慨不平疏論甚衆侂
冑患之以汝愚之門及朱熹之徒多知名士不便於
已欲盡去之謂不可一一誣以罪則設為偽學之目
以摘之用何澹劉德秀為言官專擊偽學然未有誦
言攻熹者獨絃草疏將上會改太常少卿不果沈繼
祖以追論程頤得為察官絃遂以疏授之繼祖論熹
皆絃筆也行狀自先生去國侂冑勢益張鄙夫愜人
迎合其意以學為偽謂貪黷放肆乃人真情廉潔好
禮者皆偽也科舉取士稍涉經訓者悉見排黜文章
議論根於理義者並行除毀六經語孟悉為世之大
禁猶得賤隸頑鈍無恥之徒往往引用以至鄉相繩
趨尺步稍以儒名者無所容其身從遊之士特立不
顧者屏伏邱壑依阿異儒者更名他師過門不入甚
至變易衣冠狎遊市肆以自別其非黨先生日與諸
生講學竹林精舍有勸以謝遣生徒者笑而不答本

傳自熹去國既霄勢益張何澹為中司首論專門之學文詐沽名乞辨真偽劉德秀仕長沙不為張栻之徒所禮及為諫官首論留正引偽學之罪偽學之稱蓋自此始太常少卿胡紘言比年偽學猖獗圍為不軌望宣諭大臣摧往進擬遂召陳賈為兵部侍郎未幾熹有奪職之命劉三傑以前御史論熹汝愚劉光祖徐誼之徒前日之偽黨至此又變而為逆黨即日除三傑右正言右諫議大夫姚愈論道學權臣結為死黨窺伺神器乃命直學士院高文虎草詔諭天下於是攻偽學日急選人余誥至上書乞斬熹語錄有一朋友微諷先生云先生有天生德於予底意思却無微服過宋之意先生曰某又不曾上書自辨又不曾作詩謗訕只是與朋友講習古書說這道理更不教做却做何事因曰論語首章言人不知而不愠不亦君子乎斷章言不知命無以為君子今人開口亦解說一飲一啄自有定分及遇小小利害便生趨避

計較之心古人刀鋸在前鼎鑊在後視之如無物者
蓋緣只見得這箇道理都不見那刀鋸鼎鑊耳又曰
死生有命如合在水裏死須是溺殺此猶不是深奧
底事難曉底話如今朋友都信不及覺見此道日孤
令人意思不佳滿人或勸先生散了學徒問戶省事
以避禍者先生曰禍福之來命也補如某輩皆不能
保只是做將去事到則盡付之人欲避禍終不能避
明廖德今為避禍之說者固出於相愛然得某壁立萬
仞豈不益為吾道之光李開其默足以容只是不去
擊鼓訟冤便是默不成屋下合說底話亦不敢說也
李開

是歲始修禮書

年譜名曰儀禮經傳通解其書大要以儀禮為本分
章附疏而以小戴諸義各綴其後其見於他篇及他

書可相發明者或附於經或附於義其外如弟子職
你傳傳之屬又自別為篇以附其類其目有家禮鄉
禮學禮邦國禮王朝禮喪禮祭禮大傳外傳其大體
已具者蓋十七八先是具奏欲乞修三禮曰臣聞六
經之道同歸而禮樂之用為急遭秦滅學禮樂先壞
漢晉以來諸儒補緝竟無全書其頗存者三禮而已
周官一書固為禮之綱領至其儀法度數則儀禮乃
其本經而禮記郊特牲冠儀等篇乃其義說耳前此
猶有三禮通禮學究諸科禮雖不行而士猶得以誦
習而知其說熙寧以來王安石變亂舊制廢罷儀禮
而獨存禮記之科棄經任傳遺本宗末其失已甚而博
士諸生又不過誦其虛文以供應舉至於其間亦有
因儀法度數之實而立文者則咸幽冥而莫知其源
一有大儀率用耳學臆斷而已若乃樂之為教則又
絕無師受律尺短長聲音清濁學士大夫莫有知其
說者而不知其為闕也故臣項在山林嘗與一二學

者考訂其說欲以儀禮為經而取禮記及諸經史雜書所載有及於禮者皆以附於本經之下具列注疏諸儒之說畧有端緒而私家無書檢閱無人抄寫久之未成會蒙除用學徒分散遂不能就而鍾律之制則士友間亦有得其遺意者竊欲更加參考別為一書以補六藝之闕而亦未能具也欲望聖明時詔有司許臣就秘書省太常寺閤借禮樂諸書自行招致舊日學徒數十人踏逐空閒官屋數間與之居處令其編類可以興起廢墜垂之永久使士知實學異時可為聖朝制作之助則斯文章甚會去國不及上文集答應仁仲書云前賢常患依禮難讀以今觀之只是經不分章記不隨經而注疏各為一書故使讀者不能遽曉今定此本盡去此諸弊恨不得令韓文公見之也先生李子在趺儀禮經解通解目錄先君所著家禮五卷鄉禮三卷學禮十一卷邦國禮四卷王朝禮十四卷其曰經傳通解者凡二十三卷蓋先君

晚歲之所新定是為絕筆之書唯書數一篇缺而未補而大射禮聘禮公侯大夫禮諸侯相朝禮八篇則猶未脫藁也其曰集傳集註者此書之舊名也凡十四卷為王朝禮而下卜筮篇亦缺餘則先君所草定而未暇刪改也至於喪祭二禮則嘗以規模次第屬之門人黃幹俾之類次他日書成亦當相從於此庶幾此書本末具備

三年丁巳六十八歲春正月拜命謝表

年譜前數日之夕先生方與諸生講論有以落職之命來告者先生畧起視之復坐講論如初翌日諸生方知其有指揮也尋具表謝

文集落職罷官觀謝表

落秘閣修撰依前官謝

表
戊午春

語錄季通被罪臺評及先生先生飯罷樓下起西序
行數回即中位打坐賀孫退歸指舍告諸友漢卿並
之得小過公弋取彼在穴曰先生無虞蔡所遭必傷
即至樓下先生坐睡甚酣因諸生偶語而覺諸生問
所聞蔡大事如何曰州縣捕索甚急不曉何以得罪
因與正淳說早上所問孟子所通處甚詳繼聞蔡已
遵路防衛頗嚴諸友急往中途見別先生初亦欲與經營
聞蔡留邑中皆詹元善調護之先生初亦欲與經營
包顯道因言禍福已定徒爾勞擾先生嘉之且曰顯
道說得自好未知當局如何是夜諸生坐樓下圍爐
講問而退聞蔡編管道州乃沈
繼祖文字主意詆先生也

葉賀孫

餞別蔡季通于淨安寺

宋史蔡元定傳云沈繼祖劉三傑為言官連疏詆熹
及元定未幾謫道州州縣捕元定甚急元定聞之不

解家卽就道。煮與從游者數百人。餞別蒲寺中。坐客
興歎有泣下者。煮微視元定。不異平時。因喟然曰。朋
友相愛之情。季通不挫之志。可謂兩得之矣。續集答
諸行之書云。季通之行浩然。無幾微不適意。卽子服
獨爲之涕泣流連。而不能已。處事變恤窮交。亦兩得
其理也。語錄先生往淨安寺候蔡蔡。自府乘舟就貶
過淨安。先生出寺門接之。坐方丈。寒暄外無嗟勞語。
以連日所讀參同契所疑扣之。蔡應答灑然。少遲諸
人釀酒。至飲皆醉。醉先生開行列坐寺前橋上。飲回寺
又飲。先生醉睡。方坐橋上。詹元善卽退去。先生曰。此
人富貴氣。孫賢年譜明日獨與季通會宿寒泉。相與
訂正參同契。終夕不寐。次年季通卒於春陵。先生
爲之哀慟。季通從先生遊最久。精識博聞。同輩皆不
能及。義理大原。固已心通意解。尤長於天文地理樂
律歷數兵陣之說。凡古書盤錯肯綮。學者讀之不能
以句元定。爬梳剖析。細入秋毫。莫不暢達。先生論易

推本河圖洛書皇極經世書先天圖往往多因與元
定往復而有發焉故其貶也恨無與晤語者其歿也
祭之以為精詣之識卓絕之才不可屈之志不可窮
之辨不復可見並遊之好同志之樂已矣蓋深致其
哀云洪續集與蔡季通書云自奉別後惘惘至今不
能忘於懷其幸無它諸生既來遣之不去亦姑任之
若有禍宮亦非此可免也但極難得人議完文字義
理深處便無人可告語殊憤憤益懷仰耳又與蔡
季通書云素患難行乎患難吾人平日講之熟矣今
日正要得力想為日既久處之愈安不以彼此遲速
惑其心也貶迹復挂彈文繼此須更有行遣只得靜
以俟之若得在湖嶺之間庶得聲聞易通亦一幸也

韓文考異成

文集書韓文考異前云此集今世本多不同唯近歲
南安軍所刊方氏校定本號為精善別有舉正十卷

論其所以去取之意又他本之所無也然其去取多以祥符杭本嘉祐蜀本及李謝所據館閣本為定而尤尊館閣本雖有謬誤往往曲從他本雖善亦棄不錄至於舉正則又例多而辭寡覽者或頗不能曉知故今輒因其書更為校定悉考衆本之同異而一以文勢義理及他書之可驗者決之苟是矣則雖民間近出小木不敢違有所未安則雖官本古本石本不敢信又各詳著其所以然者以為考異十卷庶幾去取之未善者覽者得以參伍而筆削焉

四年戊午六十九歲集書傳

文集按大全集二典禹謨金縢召誥洛誥武成諸說數篇及親稿百餘段具在其他悉口授蔡沈俾足成之

本李

冬十二月引年乞休

年譜先生以明年年及七十初疑猶在罪籍不敢有請繼以尚帶階官義當納祿具中建寧府乞保明申奏致仕是歲答李季章書云親舊凋零如蔡季通呂子約皆死貶所令人痛心益無生意所以惜此餘日止為所編禮書已畧見端緒而未能就若更得年餘間未死日與了却亦可瞑目矣

洪

文集中建寧府乞保明致仕狀

五年己未七十歲春三月楚辭集註後語辨證成

文集楚辭集註序云右楚辭集註八卷今所校定其第錄如上蓋自屈原賦離騷而南國宗之名章繼作通號楚辭大抵皆祖原意而離騷深遠矣竊嘗論之原之為人其志行雖或過於中庸而不可以為法然

皆出於忠君愛國之誠心原之為書其辭旨雖或流
於跌宕怪神怒懣激發而不可以為訓然皆生於纏
綿惻怛不能自己之至意雖其不知學於北方以求
周公仲尼之道而獨馳騁於變風變雅之末流以故
醇儒莊士或羞稱之然使世之放臣屏子怨妻去婦
拭淚謳吟於下而祈天者幸而聽之則於彼此之間
天性民彝之善豈不足以交有所發而增夫三綱五
典之重此余之所以每有味於其言而不敢直以詞
人之賦視之也然自原著此詞至漢末久而說者已
失其趣如太史公蓋未能免而劉安班固賈逵之書
世復不傳及隋唐間為訓解者尚五六家又有僧道
騫者能為楚聲之讀今亦漫不復存無以驗其說之
得失而獨東京王逸章句與近世洪興祖補注并行
於世其於訓詁名物之間則已詳矣顧王書之所取
舍與其題號離合之間多可議者而洪皆不能有所
是正至其大義則又皆未嘗沈潛反覆嗟歎咏歌以

尋其文詞指意之所出而遽欲取喻立說旁引曲証以強附於其事之已然是以或以迂滯而遠於性情或以迫切而害於義理使原之所為抑鬱而不得伸於當年者又晦昧而不見白於後世余於是益有感焉疾病呻吟之暇聊據舊編粗加櫟括定為集註八卷庶幾讀者得以見古人於千載之上而死者可作又足以知千載之下有知我者而不恨於來者之不聞也嗚呼怖矣是豈易與俗人言哉

夏四月有旨令守朝奉大夫致仕拜命謝表

文集乞致仕狀

致仕謝表

始用野服見客

年譜坐位榜畧云滎陽呂公嘗言京洛致仕官與人相接皆以閒居野服為禮而歎外郡或不能然其指

深矣夫上衣下裳大帶方履比之涼衫自不為簡其所便者但取束帶足以為禮解帶足以燕居而已且使窮鄉下邑得見祖宗盛時京都舊俗其美如此亦補助風教之一端也

六年庚申七十一歲春正月作聚星亭贊

年譜考亭陳氏故有離榭名曰聚星亭至是作新之先生為本原荀陳事畫著屏上而為之贊末云或乃附曹羣亦忌漢嗣守之難古今所歎又曰高山景行好德所同課忠責孝獨概余衷百爾窺臨鏡考毋怠開國承家永奉明戒

先生之意深矣

洪本

文集聚星亭贊

三月辛酉改大學誠意章

三月初先生病已甚猶修書不輟夜為諸生講論多至夜分且曰為學之要惟在事事審求其是決去其非積累久之心與理一自然所發皆無私曲聖人應萬事天地生萬物直而已矣是日改大學誠意章午後暴下不能興隨入室堂自此不復能出樓下

甲子先生卒

年譜前夕癸亥精舍諸生入問疾先生起坐曰誤諸君遠來然道理亦止是如此但相倡率下堅苦工夫牢固著足方有進步處諸生退先生乃作三書一與予在今早歸收拾遺文一與黃幹令收禮書底本補緝而成之具書界行開具逐項合修條目且封一卷往為之式一與范念德託寫禮書甲子即命移寢中堂黎明諸生復入問疾因請曰先生之疾革矣萬一不諱當用書儀乎曰踈畧然則當用儀禮乎乃頷之

良久恬然而逝午初刻也享年七十有一送終諸禮皆遵遺訓焉是日大風拔木鴻水崩山哲人之萎豈

小變哉

本洪

黎明諸生復入問疾因請曰先生之疾革

矣萬一不諱常用書儀乎先生搖首然則常用儀禮

乎亦搖首然則以儀禮書儀參用之乎乃頷之

李

太行

狀先生疾且革手為書囑其子在與門人范念德黃

齡尤拳拳以勉學及修正遺書為言翌旦門人侍疾

者請教先生曰堅苦問溫公喪禮曰跡畧問儀禮頷

之已而正坐整冠衣就枕而逝門人治喪者既一以

儀禮從事而訃告所至從遊之士與夫聞風慕義者

莫不相與為位而聚哭焉禁銅雖嚴有所不避也蔡

沈夢奠記慶元庚申三月初二日丁巳先生簡附葉

味道來約沈下考亭當晚即與味道至先生侍下是

夜先生看沈書集傳說數十條及時事甚悉精舍諸

生皆在四更方退只沈宿樓下書院初三日戊午先

生在樓下改書傳兩章又貽修稽古錄一段是夜說

書數十條初四日己未先生在樓下商量起小亭於門前洲上先生自至溪岸相視陳履道載酒飲於新築亭基時溪東山間有戰聲甚異里人在坐者云前後如此鄉里輒有喪禍然聲未嘗有此雄也是夜說書至太極圖初五日庚申先生在樓下臟腑微利邑宰張揆來見有餽先生却之謂知縣若寬一分百姓得一分之惠揆藉時相之勢凶熖可畏百姓苦之是夜說西銘又言為學之要惟事事審求其是決去其非積累日久心與理一自然所發皆無私曲聖人應萬事天地生萬物直而已矣初六日辛酉改大學誠意章令詹淳騰寫又改數字又修楚辭一段午後大瀉隨入宅室自是不復能出樓下書院矣初七日壬戌先生臟腑甚脫文之墊自五夫歸初八日癸亥精舍諸生來問病先生起坐曰誤諸生遠來然道理只是俟他但大家倡率做此堅苦工夫須牢固著脚力方有進步處時在坐者林子武夔孫陳器之趙葉味

道賀孫徐居父字方伯起劉擇之成道趙惟夫范益之元裕及沈先生顧沈曰某與先丈病勢一般決不能起沈答曰先人病兩月餘先生方苦臟腑然老人體氣易虛不可不急治之蓋先生病實與先人相似上極熱揮扇不輟下極冷洩瀉不止先人亦初因痞結服神功丸致動臟腑春陵病革時嘗作先生書及此故也諸生退先生作范伯崇念德書託寫禮書且為冢孫擇配又作黃直卿翰書令收禮書底本補葺成之又作敬之在書令早歸收拾文字且歎息言許多年父子乃不及相見也夜分令沈檢巢氏病源劉擇之云待制脈絕已三日矣只是精神定把得如此分曉初九日甲子五更令沈至卧内先生坐牀上沈侍立先生以手挽沈衣令坐若有所欲言而不言者久之醫士諸葛德裕來令無語用治命移寢中堂平明精舍諸生復來問病味道云先生萬一不諱禮數用書儀何如先生搔首益之云用儀禮何如先生復

搔首沈曰儀禮書儀參用何如先生首肯之然不能
言意欲筆寫示左右以手版托紙進先生執筆如平
時然力不能運少頃置筆就枕手誤觸巾目沈正之
諸生退沈坐首邊益之坐足邊先生上下其視瞳猶
炯然徐徐開合氣息漸微而逝午初刻也是日大風
破屋左右梧桐等大木皆拔未幾洪水山皆崩陷其
所謂山頽木壞者歟嗚呼痛哉先生頻年腳氣自入
春來尤甚以足弱氣痞步履既艱刺痛更作服藥不
效先生謂沈曰腳氣發作異於常年精神頓壞自覺
不能長久閏二月俞倬夢達聞中自邵武至延平過
考亭薦醫士張修之張至云須畧攻治法去其壅滯
方得氣脈流通先生初難之以問劉擇之擇之蓋素
主不可攻治者叩其用藥擇之曰治粗人病爾此豈
所宜張孰甚力擇之不能屈先生亦念此病恐前後
醫者只養得住遂用其藥初製黃耆黨參等服之
小效繼用已豆三稜莪朮等藥覺氣快足輕向時遇

食多不下腸之病皆去既而大腑又秘結先生再服
溫白丸數粒臟腑通而泄瀉不止矣黃芽歲丹作大
劑投之皆不效遂至大故嗚呼痛哉先君歿春陵時
謂沈曰先生老矣汝歸終事之未逾年先生亦歿數
奇命薄學未有聞而父師俱往抱無涯之悲飲終天
之恨幾何不寤苦而遂死也嗚呼痛哉武夷蔡沈書
記文集與黃直卿書云三月八日熹啓人還得書知
已至三山一行安樂又知授學次第人益信向所示
告大規約皆佳深以為慰今想愈成倫理凡百更宜
加勉力吾通之託在此者吾無憾矣哀病本自畧有
安意為俞夢蓮薦一張醫來用硃砂巴豆等攻之病
遂大變此兩日愈甚將恐不可支吾泰兒又遠在干
里外諸事無分付處極以為撓然凡百已定只得安
之耳異時諸子諸孫切望直卿一一推誠力賜教誨
使不大為門戶之羞至祝至祝鳳老所事餘于有許
可問也不禮書今為用之願之不來亦不濟事無人

商量可使報之可且就直卿處折衷如向來喪禮詳畧皆已得中矣臣禮一篇魚舊本今先附案一面整理其他並望參考條例以次修成就諸處借來可校作兩樣本行道大小並附去並紙各千番可收也諫之公庶各煩致意不意遂成永訣各希珍重仁卿未行亦為致意病昏且倦作字不成所懷千萬徒切悽其點不具

年譜先生閒居未明而起深衣幅巾方履拜於家廟以及先聖退坐書室几案必正書籍器用必整其飲食也羹食行列有定位起箸舉措有定所倦而休也瞑目端坐休而起也整步徐行中夜而寢既寢而寤則擁衾而坐或至達旦其色莊其言厲其行舒而恭其坐端而直威儀容止之則自少至老祁寒威暑造次顛沛未嘗有須臾之離也平居惓惓無一念不在於國聞國政之闕失則戚然有不豫之色語及國勢

之未振則感慨以至泣下然自少時即以興起斯文
為己任倪馬孜孜不知老之將至若不屑於斯世者
及其出而事君則竭忠直誠不顧其身推以臨民則
除其疾苦而正其風俗未嘗不欲其道之行也雖遇
知於人主而不容於邪枉故自筮仕以至屬績五十
年間厯事四朝仕於外者僅九考立於朝者四十日
而已豈非天將以先生紹往聖之統覺來世之迷故
嗇之於彼而厚之於此歟洪行狀先生平居惓惓無
一念不在於國聞時政之闕失則戚然有不豫之色
語及國勢之未振則感慨以至泣下然謹難進之禮
則一官之拜必抗章而力辭厲易退之節則一語不
合必奉身而亟去其事君也不貶道以求售其愛民
也不徇俗以苟安故其於世勅輒齟齬自筮仕以至
屬績五十年間厯事四朝仕於外者僅九考立於朝者
四十日道之難行也如此然紹道統立人
極為萬世宗師則不以用舍為加損也

冬十一月壬申葬于建陽縣唐石里之大林谷

年譜會葬者幾千人

李本

既歿將葬言者謂四方

偽徒期會送偽師之葬會聚之間非妄談時人短長

則認議時政得失望

今守臣約束從之

免齋先生作行狀云自韋齋先生得中原文獻之傳聞河洛之學推明聖賢遺意日誦大學中庸以用力於致知誠意之地先生早歲已知其說而心好之韋齋病且革屬曰籍溪胡原仲白水劉致中屏山劉彥冲三人吾友也學有淵源吾所敬畏吾即死汝往事之而唯其言之聽則吾死不恨矣先生既孤則奉以告三君子而稟學焉時年十有四慨然有求道之志博求之經傳徧交當世有識之士雖釋老之學亦必究其歸趣訂其是非延平李先生學於豫章羅先生羅先生學於龜山楊先生延平於韋齋為同門友先

生歸自同安不遠數百里徒步往從之延平稱之曰
樂善好義鮮與倫比又曰穎悟絕人力行可畏其所
論難體認切至自是從遊累年精思實體而學之所
造者益深矣其為學也窮理以致其知反躬以踐其
實居敬者所以成始成終也謂致知不以敬則昏惑
紛擾無以察義理之歸躬行不以敬則怠惰放肆無
以致義理之實持敬之方莫先主一既為之箴以自
警又筆之書以為小學大學皆本於此儼然端坐一
室討論訓典未嘗少輟自吾一心一身以至萬事萬
物莫不有理存此心於齋莊靜一之中窮此理於學
問思辨之際皆有以見其所當然而不容己與其所
以然而不可易然充其知而見於行者未嘗不反之
於身也不睹不聞之前所以戒懼者愈嚴愈敬隱微
幽獨之際所以省察者愈精愈密思慮未萌而知覺
不昧事物既接而品節不差無所容乎人欲之私而
有以全乎天理之正不安於偏見不急於小成而道

之正統在是矣其為道也有太極而陰陽分有陰陽而五行具稟陰陽五行之氣以生則太極之理各具於其中天所賦為命人所受為性感於物為情統情性為心根於性則為仁義理智之德發於情則為惻隱羞惡辭遜是非之端形於身則為手足耳目口鼻之用見於事則為君臣父子夫婦兄弟朋友之常求諸人則人之理不異於己參諸物則物之理不異於人貫徹古今充塞宇宙無一息之間斷無一毫之空闕莫不析之極其精而不亂然後合之盡其大而無餘先生之於道可謂建諸天地而不悖質諸聖賢而無疑矣故其得於己而為德也以一心而盡造化之原盡性情之妙達聖賢之蘊以一身而體天地之運備事物之理任綱常之責明足以察其微剛足以任其重弘足以致其廣毅足以極其常其存之也虛而靜其發之也果而確其用之也應事接物而不窮其守之也忍變履險而不易本末精粗不見其或遺表

衰始終不見其或異至其養深積厚矜持者純熟嚴厲者和平心不待操而存義不待索而精猶以為義理無窮歲月有限常歉然有不足之意蓋有日新又新不能自己者而非後學之所可擬議也其可見之行則修諸身者其色莊其言厲其行舒而恭其坐端而直其閑居也未明而起深衣幅巾方履拜於家廟以及先聖退坐書室几案必正書籍器用必整其飲食也羹食行列有定位匕箸舉措有定所倦而休也瞑目端坐休而起也整步徐行中夜而寢既寢而寤則擁衾而坐或至達旦威儀容止之間則自少至老祁寒盛暑造次顛沛未常有須臾之離也行於家者奉親極其孝撫下極其慈閨庭之間內外斬斬恩義之篤怡怡如也其祭祀也事無纖鉅必誠必敬小不如儀則終日不樂已祭無違禮則油然而喜死喪之際哀戚備至飲食哀經各稱其情賓客往來無不延過稱家有無常盡其歡於親故雖踈遠必致其愛於

卿閭雖微賤必致其恭吉凶慶弔禮無所遺賙卹問遺恩無所缺其自奉則衣取蔽體食取充腹居止取足以障風雨人不能堪而處之裕如也若其措諸事業則州縣之設施立朝之言論經綸規畫正大宏偉亦可概見雖達而行道不能施之一時然退而明道足以傳之萬代謂聖賢道統之傳散在方冊聖經之旨不明則道統之傳始晦於是竭其精力以研窮聖賢之經訓於大學中庸則補其闕遺別其次第綱領條目粲然復明於論語孟子則深原其當時問答之意使讀而味之者如親見聖賢而面命之於易與詩則求其本義攻其末失深得古人遺意於數千載之上凡數經者見之傳注其闕於天命之徵人心之奧入德之門造道之域者既已極深研幾探賾索隱發其旨趣而無所遺矣至於一字未安一詞未備亦必沈潛反復或連旦不寐或累日不倦必求至當而後已故章旨字義至微至細莫不理明詞順易知易行

於書則疑今文之難誼反不若古文之平易於春秋則疑聖心之正大決不類傳注之穿鑿於禮則病王安石廢罷儀禮而傳記獨存於樂則憫後世律尺既亡而清濁無據是數經者亦嘗討論本末雖未能著為成書然其大旨固已獨得之矣若歷代史記則又考論西周以來至於五代取司馬編年之書繩以春秋紀事之法綱舉而不繁目張而不紊國家之理亂君臣之得失如指諸掌周程張邵之書所以繼孔孟道統之傳歷時未久微言大義鬱而不章先生為之哀集發明而後得以盛行於世太極先天二圖精微廣博不可涯涘為之解剝條畫而後天地本原聖賢蘊奧不至於泯沒程張門人祖述其學所得有淺深所見有疎密先生既為之區別以悉取其所長至或識見小偏流於異端者亦必研窮剝析而不沒其所短南軒張公東萊呂公同出其時先生以其志同道合樂與之友至或識見少異亦必講磨辨難以一其

歸至若求道而過者病傳注誦習之煩以為不立文字可以識心見性不假修為可以造道入德守虛靈之識而昧天理之真借儒者之言以文老佛之說學者利其簡便詆訾聖賢捐棄經典猖狂叫呶側僻固陋自以為悟立論愈下者則又崇獎漢唐比附三代以便其計功謀利之私二說並立高者陷於空無下者溺於卑陋其害豈淺淺哉先生力排之俾不至亂吾道以惑天下於是學者靡然向之先生教人以大學語孟中庸為入道之序而後及諸經以為不先乎大學則無以提綱絜領而盡論孟之精微不參之論孟則無以融會貫通而極中庸之旨趣然不會其極於中庸則又何以建立大本經綸大經而讀天下之書論天下之事哉其於讀書也必使之辨其音釋正其章句玩其辭求其義研精覃思以究其所難知平心易氣以聽其所自得然為己務實辨別義利毋自欺謹其獨之戒未嘗不三致意焉蓋亦欲學者窮理

反身而持之以敬也從遊之士迭誦所習以質其疑
意有未喻則委曲告之而未嘗倦問有未切則反覆
戒之而未嘗隱務學篤則喜見於言進道難則憂形
於色講論經典商畧古今率至夜半雖疾病支離至
諸生問辨則脫然沈疴之去體一日不講學則惕然
常以為憂捫衣而來遠自川蜀文詞之傳流及海外
至於夷狄亦知慕其道竊問其起居窮鄉晚出家蓄
其書私淑諸人者不可勝數先生既沒學者傳其書
信其道者益衆亦足以見理義之感於人者深矣繼
往聖將微之緒啓前賢未發之機辨諸儒之得失聞
異端之訛謬明天理正人心事業之大又孰有加於
此者至若天文地志律厯兵機亦皆洞究淵微文詞
字畫騷人才士疲精竭神常病其難至先生未嘗用
意而亦皆動中規繩可為世法是非資稟之異學行
之篤安能事事物物各當其理各造其極哉學修而
道立德成而行尊見之事業者又如此秦漢以來迂

儒曲學既不足以望其藩牆而近代諸儒有志乎孔
孟周程之學者亦豈能以造其間域哉嗚呼是殆天
所以相斯文篤生哲人以大斯道之傳也竊聞道之
正統待人而後傳自周以來任傳道之責得統之正
者不過數人而能使斯道章章較著者一二人而止
耳由孔子而後曾子子思繼其微至孟子而始著由
孟子而後周程張子繼其絕至先生而始著蓋千有
餘年之間孔孟之徒所以推明是道者既已煨燼殘
闕離析穿鑿而微言幾絕矣周程張子崛起於斯文
湮塞之餘人心蠢壞之後扶持植立厥功偉然未及
百年踏駁尤甚先生出而自周以來相傳之道一旦
豁然如日月中天昭晰呈露則據其言行又可畧歟
而又私竊其道統之著者
終之以俟知德者考焉

果齋李氏曰先生之道之至原其所以臻斯聞者無
他焉亦曰主敬以立其本窮理以致其知反躬以踐

其實而敬者又貫通乎三者之間所以成始而成終者也故其立敬也一其內以制乎外齊其外以養其內內則無二無適寂然不動以為酬酢萬變之主外則儼然肅然終日若對神明而有以保固其中心之所存及其久也靜虛動直中一外融而人不見其持守之力則篤敬之驗也其窮理也虛其心平其氣字求其訓句索其旨未得乎前則不敢求乎後未通乎此則不敢忘乎彼使之意定理明而無躁易凌躐之患心專慮一而無貪多欲速之蔽始以熟讀使其言皆若出於吾之口繼以精思使其意皆若出於吾之心自表而究裏自流而溯源索其精微若別黑白辨其節目若數一二而又反復以涵泳之切己以體察之必若先儒所謂沛然若河海之浸膏澤之潤渙然水釋怡然理順而後為有得焉若乃立論以驅率聖言鑿說以妄求新意或援引以相糾紛或假借以相湊感麤心浮氣意象匆匆常若有所迫逐而未嘗徘徊

徇顧戀如不忍去以待其決洽貫通之功深以為學者之大病不痛絕乎此則終無入德之期蓋自孔孟以降千五百年間讀書者衆矣未有窮理若此其精者也其反躬也不睹不聞之前所以戒懼者愈嚴愈敬隱微幽獨之際所以省察者愈精愈密思慮未萌而知覺不昧事物既接而品節不差視聽言動非禮不為意必固我與迹俱泯無所容乎人欲之私而有以全乎天理之正蓋語默云為之際周旋出入之頃無往而非斯道之流行矣合是三者而一以貫之其惟敬乎先生天姿英邁視世之所屑者不啻如草芥脩然獨與道俱卓然獨與道立固已迥出庶物之表及夫理明義精養深積盛充而為德行發而為事業人之視之但見其渾灝磅礴不可涯涘而莫知為之者雖門人弟子親炙之久固亦莫得而形容也姑以蠡測管窺者言之則備諸身者其色莊其言厲其行舒而恭其坐端而直其閒居也未明而起幅巾大帶

方履拜於家廟以及先聖退坐几案必正書籍器用必整其飲食也羹食行列有定位匕箸舉措有定所倦而休也瞑目端坐休而起也整步徐行中夜而寢既寢而寤則擁衾而坐或至達旦威儀容止之則自少至老祁寒盛暑造次顛沛未嘗有須臾之離也行於家者奉親極其孝撫下極其慈閭庭之間內外斬斬恩誼之篤怡怡如也其祭祀也事無纖鉅必誠必敬小不如儀則終日不樂已祭無違禮則油然而安死喪之際哀戚備至飲食哀經各稱其情賓客往來無不延遇稱家有無常盡其歡於親故雖踈遠必致其愛於鄉閭雖微賤必致其恭吉凶慶弔禮無所遺賙恤問遺思無所闕其自奉則衣取蔽體食取充腹居止取足以障風雨人不能堪而處之裕如也至於人以事君則必思堯舜其君出以治民則必欲堯舜其民言論風旨之所傳政教條令之所布罔皆可為世法而其考諸先聖而不繆建諸天地而不悖百世

以俟聖人而不惑者則以訂正羣書立為準則使學者有所據依循守以入於堯舜之道此其勲烈之尤彰明盛大者語孟二書世所誦習為之說者亦多而析理未精釋言未備大學中庸至程子始表章之然大學次序不倫闕遺未補中庸雖為完篇而章句渾淪讀者亦莫知其條理之粲然也先生蒐輯先儒之說而斷以己意彙別區分大從字順妙得聖人之本旨昭示斯道之標的又使學者先讀大學以立其規模次及語孟以盡其蘊奧而後會其歸於中庸尺度權衡之既定由是以窮諸經訂羣史以及百世之書則將無理之不可精無事之不可處矣又嘗集小學使學者得以先正其操履集近思錄使學者得以先識其門庭羽翼四子以相左右蓋此六書者學者之飲食裘葛準繩規矩不可以須臾離也聖人復起不易斯言矣其於易也推卦畫之本體辨三聖之旨歸專主筮占而實該萬變以還潔靜精微之舊其於詩

也深玩辭氣而得詩人之本意盡削小序以破後儒之臆說妄言美刺悲就芟夷以復溫柔敦厚之教其於禮也則以儀禮為經而取禮記及諸經史書所載有及於禮者皆以附於本經之下具例註疏諸儒之說補其闕遺而析其疑晦雖書不克就而宏剛大要固已舉矣謂書之出於口授者多艱澁得於壁藏者反平易學者當沈潛反覆於其易而不必穿鑿附會於其難謂春秋正義明道尊王賤霸尊君抑臣內夏外夷乃其大義而以爵氏名字日月土地為褒貶之例若法家之深刻乃傳者之鑿說謂周官徧布周密周公運用天理熟爛之書學者既通四子又讀一經而遂學焉則所以治國平天下者思過半矣謂通鑑編年之體近古因就繩以策牘之法以綱提其要以目紀其詳細倣春秋而兼採羣史之長目倣左氏而稽合諸儒之粹褒貶大義凜乎烈日秋霜而繁簡相發又足為史家之矩範謂諸子百家其言多詭於聖

人獨韓子論性專指五常最為得之因為之考訂其
集之同異以傳於世而屈原忠憤千古莫白亦頗為
發明其旨樂律久亡清濁無據亦嘗討論本末探測
幽眇雖未及著為成書而其大旨固已獨得之矣若
夫析世學之終辨異教之非擗其巢穴殫其隱微使
學者由於大中至正之則而不躋於荆棘獲罪之塗
惟陷肅清之功固非近世諸儒所能髣髴其萬一也
自夫子設教洙泗以博文約禮授學者顏曾思孟相
與守之未嘗失墜其後正學失傳士各以意為學其
驚於該洽者既以聞見積累自矜而流於泛濫駁雜
之歸其溺於徑約也又謂不立文字可以識心見性
而陷於曠蕩空虛之域學者則知所傳矣亦或悅於
持敬之約而憚於觀理之煩先生身任道統而廣覽
載籍先泰古書既加考索歷代史記國朝典章以及
古今儒生學士之作靡不偏觀取其所同而削其不
合稽其實用而剪其煩蕪參伍辨證以扶經訓而詰

其舛差秋毫不得遁焉數千年間世道學術議論文
詞之變皆若身親歷於其間而耳提目覩焉者大本
大根固已上達直遂柯葉散殊亦皆隨其所至究其
所窮條分派別經緯萬端本末巨細包羅囊括無所
遺漏故所釋諸書悉有依據不為臆度料想之說外
至文章字畫亦皆高絕一世蓋其包涵停蓄博博淵
泉故其出之者自若是其無窮也學者據經辨疑隨
問隨析固皆極其精要暇而辨難古今其應如響愈
加愈深亶亶不絕及詳味而細察之則方融貫於一
理而已矣嘗有言曰學者望道未見固必即書以窮
理苟有見焉亦當考諸書有所證驗而後實有所裨
助而後安不然則德孤而與枯槁寂滅者無以異矣
潛心大業何有哉矧自周衰教失禮樂養德之具一
切盡廢所以維持此心者惟有書耳謂可躡轡經傳
遽指為糟粕而不觀乎要在以心體之以身踐之而
勿以空言視之而已矣以是存心以是克己仁豈遠

乎哉至於晚歲德尊言立猶以義理無窮歲月有限
慨然有不足之意沐浴以還博文約理兩極其至者
先生一人而已先生教人規模廣大而科級甚嚴循
循有序不容躐等凌節而進至於切己務實別義利
毋自欺謹其獨之戒未嘗不丁寧懇到提耳而極言
之每誦南軒張公無所為而然之語必三歎焉學者
即其所誦而質其疑意有未諭則委曲告之而未嘗
倦問有未切則反復戒之而未嘗隱務學篤則喜見
於言進道難則憂形於色講論商畧率至夜半雖疾
病支離至諸生問辨則脫然沈疴之去體一日不講
學則惕然常以為憂晚見諸生繼繞於文義之間深
慮斯道之無傳始頗指示本體使深思而自得之其
望於學者益切矣嗚呼道之在天下未嘗亡也而統
之相傳苟非其人則不得而與自孟子沒千有餘年
而後周程張子出焉歷時未久寢失其真及先生出
而後合濂洛之正傳紹鄒魯之墜緒前聖後賢之道

該偏全備其亦可謂盛矣蓋昔者易更三古而溷於
八索詩書煩亂禮樂散亡而莫克成也夫子從而贊
之定之刪之正之又作春秋六經始備以為萬世道
德之宗主秦火之餘六經既已爛脫諸儒各以己見
妄穿鑿為說未嘗有知道者也周程張子其道明矣
然於經書未暇釐正一時從遊之士或昧其旨遁而
入於異端者有矣先生於是考訂訛謬探索深微總
裁大典勒成一家之言仰包粹古之載籍下採近世
之文獻集其大成以定萬世之法然後斯道大明如
日中天有目者皆可睹也夫子之經得先生而正夫
子之道得先生而明起斯文於將墜
覺來裔於無窮雖與天壤俱弊可也

朱子年譜卷四